

Hewuraio

Anitâ yet Yesu yetgât dopyetŋe konohâk oap.

¹⁻² Yura lohimbi, Anitâ nanŋahât topŋe ekyongomune nâŋgâŋet. Anŋoân topŋe katmâ tâmbâlipnennŋaŋe ikŋe topŋe nâŋgâm henŋenŋuŋetgât Anitâŋe ikŋe den poropeteliŋe yenŋât biwiyenŋan kalop. Biwiyenŋan katmu yâkŋe lohimbi ekyongonŋetâ nâŋgâwi. Poropeteliŋaŋe den sâwi yakât bulâŋe yamâ Anitâŋe nanŋe hânŋângumu giop. Otmu nanŋahât topŋe yamâ yuwu. Embânŋâmbâek hân himbim ki kândikyotgop yapâek Anitâŋe nanŋe ombe bisinŋe orop biwiyetŋaŋe konohâk otmâ hân himbim pitu me senŋe âlâlâ topŋe topŋe kândikuowot. Otmu senŋe âlâlâ kândikuowot ya nannŋe galemguâk sâm Âwânŋaŋe sâm waŋop. Yawu gârâmâ nanŋaŋe kârikŋe otmâ hân himbim me senŋe âlâlâ topŋe topŋe ya hohem tatmap. Otmu tatmâ yâhâwiop.

³ Otmu âwâ nan yâk yetgât topyetŋe yamâ dop konohâk oap. Yakât dop kum sâmmune nâŋgâŋet. Sikopŋe pilâm denŋânân hâumu gilenŋ beleŋ sâmap dop yawuâk Anitâhât towatŋe Yesuhâlen tetemu ekbin. Otmu Âwânŋaŋe nanŋahât nâŋgâm nen umam sâningiâkgât nanŋaŋe hânân yuân ge nengât tosanennahât matŋe mem muop. Mumu hanguwî yamâ lohimbiŋe yâkât nâŋgâŋetâ yahalâkgât âwâŋe Anitâ manman ambonŋaŋe mumuŋambâ mem yahalop. Yahatmâ himbimân yâhâmu âwâŋe Anitâ orop tawot.

Anitâ nanŋaŋe aŋelo kerek yengât kunyeŋe tatmap.

⁴ Anitâŋe nanŋe orop dop konohâk tawot yâkât nâŋgâmu yahalop. Yawu otbaŋgim aŋelo yamâ yâkât amutgen katyehop. Yakât topŋe yuwu.

⁵ Emelâhâmâ Anitâŋe den yuwu sâŋ nanŋe ekuop ya poropete âlâŋe kulemguop.

“Gâmâ nâhât nanne ombe bisine. Yawu gârâmâ yiwereŋe yu yakât topŋe sâŋ teterâ lohimbi kerekŋe ekmâ nâŋgâŋet sâŋ katgeksan.”

Yawu sâŋ ekuop. Otmu torokatmâ sâop.

“Nine nanne kambiamne”. Otmu yâku yawuâk “Awoŋne” sâop.

Anitâŋe den sâmu kulemguop yamâ aŋelo yengât ki sâop. Yesuhât nâŋgâm sâmu kulemguop.

⁶ Anitâhât nanŋe himbimânâk tatmâ irak hâŋgângumu hânân gewe sâŋ olop. Sâp yan Anitâŋe ikŋe nanŋahât aŋelolipŋaŋe nâŋgâŋetâ yahatmu haonmâ ârândâŋ mepaenŋetgât den ekyongop. Yawu otmu aŋelolipŋaŋe yâkât nâŋgâŋetâ yahalop. Otmu Anitâ nanŋaŋe aŋelo kerek yengât kunyeŋe tatmap.

⁷⁻⁸ Otmu aŋelo yengât topyeŋe yakât Anitâŋe yuwu sâŋ tetemu lok âlâŋe kulemguop.

“Nâŋe aŋelolipne hâŋgânyongomune yâkŋe in yawu laune lâumai. Otmu biatŋet sâmune gurâ biatnomaihât dop tap.”

Yawu sâop. Yâhâ ikŋe nanŋe tiŋâk yakârâmâ yuwu sâŋ tetemu lok âlâŋe kulemguop.

“O, Pato gikak lohimbilipge hilâm ârândâŋâk ti-hityeŋe otmâ yâhâmbisângât dop tap. Yâhâ

yu me ya otmâ tâpikguwuatgât dop âlâ ki tap.
 Âilongoâk tatmâ yâhâmbisân.

⁹ Otmu orotmeme bâleŋe otŋetâ yakât nâŋgârâ
 bâlemap. Yâhâ orotmeme âlepŋe otŋetâ
 yanâmâ yakât nâŋgârâ ârândâŋ otmap. Yawu
 gârâmâ gâŋe otmat yakât nâ Anitâ patohaŋe
 yakât nâŋgâmune ârândâŋ oap. Yakât otmâ
 gâ hâŋgâŋohomune ge lohimbi komotŋe
 komotŋe yeŋgât galem pato manbuat. Yawu
 manmâ mem dâiyekdâ gike orowâk heronŋe
 kakŋan manmâ yâhâmbisâi.”

¹⁰ Otmu den âlâ yuwu sâop.

“Pato, angoânâk gâŋe hân himbim pitu me senŋe
 âlâlâ ya topŋe katmâ tuhuon.

¹¹⁻¹² Yawu gârâmâ senŋe âlâlâ topŋe topŋe
 tuhuon yamâ hâmbâi gulip otbuap. Pet
 sâŋgum mem haŋgalakmâ mansai yamâ
 hâreakmâ tâtuk sâwuap yakât dopŋeâk
 hân himbim yamâ hâmbâi gulip otmâ
 metewuap. Yâhâ gâŋeâmâ embâŋâmbâek
 tatmâ gaonŋak tatmâ gamat. Otmu yawuâk
 tatmâ yâhâmbisân. Otmu itâ hambuŋe me pet
 hâŋgiŋe yawuya pilâŋetâ tatmâ tâtuk sâmu
 âiŋe memai yakât dopŋeâk gâŋe sârâ hân
 himbim gulip otbuap. Gulip otmu yanâmâ
 yâhâpŋe sârâ âiŋe tetewuap.”

Yawu sâm ekuop.

¹³ Otmu Anitâŋe sâp âlâen yuwu sâm ekuop.

“Gâŋe nâhât hahit mem kinmâ yan kasalipge
 mem ge katyekbuat.”

Yawu sâop. Den ya nanŋe ekuop. Anelolipŋe ki
 ekyongop.

14 Anjelo yengârâmâ Anitâņe yuwu sâop. “Nâņe hângânyongomune hoņ banihinomai. Hoņ banihim gemâmâ nâhât komolipne yengât nângâm manman kârikņahât pat kuyiņgiwan ya yengât tihityeņe otnomai.” Yawu sâm hângânyongomu gewi. Yawu gârâmâ Anitâ ikņe nanņe yâkņeâmâ kerek yengât kunyeņe tatmap.

2

Anitâņe nanņe hângângumu kuwiknenehâkgât giop.

¹ Yakât otmâmâ nanņe hângângumu ge hohetnenņan manmâ gaop. Manmâ den sâop ya nângâmunņe bulâņe otmu biwinenņan katmâ lâum mannom. Ki lohotņe otmâ pilânom.

² Emelâk topņe katmâ Anitâņe aņelolipņe hângânyongomu tâmbâlipnenņe yengâlen ge den ya sâm tetem ekyongowi. Den ekyongowi yakât bulâņe teteop. Yâhâ lohimbi nombotņe den ya nângâņetâ gemu bet pilâwi yamâ Anitâņe in yawu yakât matņe yiņgiop.

³⁻⁴ Yawu gârâmâ sâp yiwerene yuâmâ Anitâņe ikņe nanņe hângângumu mem kuwiknenekbe sâm giop. Mem kuwiknenekbe sâm gem ikņe den pat bulâņe ya teteâkgât Yesu Kutdânenņe ikņahâk den ya sâm tetem eknongop. Eknongomâmâ Anitâņe ikņe nanņahât den yakât bulâņe lâuwuap yawu sâm kulem ki orotņe otminiop. Otmu ikņe engatņeâk otmâ Wâtgât mâmâņahât Heak hângângumu yâkât komolân gem heņgemnongom mâmâņe otningimu yakât bulâņe tetemu mewin. Otmu aņgoân Anitâņe otbaņgiwi yakât matņe yiņgiop. Umatņe

yawuya teteningimap sâm yakât Anitâhât nanŋe bulâŋe yawu sâm ya nâŋgâm biwinenŋaŋe mem yâhânôm. Ki lohotŋe otmâ pilânôm.

Yesuŋe dâinenekmâ manman kârikŋan katnenekmu manmâ yâhânôm.

⁵ Otmu lok nenŋahât sâwe. Anitâhât aŋelolipŋaŋe lohimbi nengât kunnenŋe mannomaihât yâkŋe ki ekyongop. Bia. Nanŋaŋe lohimbi nengât kunnenŋe pato otmâ tihitnenŋe galem otbisâpŋât sâm kalop.

⁶ Yawu gârâmâ Anitâŋe yakât sâm lok âlâhât nâŋgân nâŋgânŋan den yuwu katmu kulemguop.

“O, Anitâ, gâhât nâŋgâmunŋe yahatmap. Nenâmâ lohimbi tâŋât. Yamâ gâŋe gâmâ nengât tepge nâŋgâm kunnenŋe tatmâ gamat ya nâŋgâmunŋe bimbi oap.

⁷ Otmu nenŋe aŋelo yeŋgât amutgen sâp tâlâwâk manmain. Yâhâ wahap topŋe topŋe kalon ya yeŋgât galemyeŋe otmâ mannom sâm yakât pat kuningion.

⁸ Yawu sâm pat kuningion yakât bulâŋe nengât nâŋgâŋetâ yahatbuapŋât mem katnenekdâ ya galemयोगom yâhânôm.”

Den yawu tap. Yawu gârâmâ yakât bonŋe hâmbâi tetewuap. Sâp yiwerenŋe yu nenŋe wahap topŋe topŋe yakât galem ki otmâ mansain.

⁹ Yawu gârâmâ nenŋe aŋelo yeŋgât amutgen mansain dop yawuâk Anitâŋe ikŋe eŋgatŋeâk otmâ Yesuŋe buku otningiâkgât hâŋgângumu himbimâmbâ ge lok olop. Lok otmâ hânân manop sâp yanâmâ aŋelo yeŋgât amutgen manop. Yawu manmâ nengât sâm hâhiwin nâŋgâm muop. Mumu

yanâmâ Âwâñe ekmâ, “Nanne kambiamne,” sâm yan lohimbiñe yâkât nâñgâñetâ yahalâkgât mu-muñambâ mem yahalop. Mem yahatmâ manman kârikñe yakât amboñe sâm katmu nengât kun-nenñe otmâ tatmap.

¹⁰ Otmu âwâñe Anitâñe emelâk embâñân wahap topñe topñe kalop ya mem hohem talâk sâm nanñe âi wañop. Âi wañop ya kerek tuhum meteop. Ya nâñgâmu ârândâñ otmu yakât otmâmâ nenñe mum hiliwahonomgât dop ki tap. Yâkñe dâinenekmâ manman kârikñan katnenekmu manmâ yâhânom.

¹¹ Bukulipne, bulâñanâk Anitâñe nanñe hâñgângumu ge tosa barak manop. Yawu manmâ gam nengât tosanenñe pilâningimu âwâñe Anitâñe nine nanne baratne koko salek sâm menenekmu mansain. Otmu Yesuñe gurâ nengât yawuâk imi garilipne sâmap.

¹² Yakât bulâñe tetewuapgât nâñgâm Yesuñe âwâñe yuwu sâm ekuop.

“O, Anitâ, imi garilipnañe nâhâlen torokatmâ mansai ya gâhât topge sâm tetem ekyon-gowom. Otmu kiki menjihimune nâhâlen torokatñetâ orowâk mepaeheknom.”

Yawu sâm ekuop.

¹³ Otmu âlâmâ yuwu sâop.

“Nâñe Anitâhâlen biwinañe kepeiman.”

Otmu âlâmâ yuwu sâop.

“Lohimbiñe Anitâhâlen biwiyañe kepeimai yâk yekmâ nine nan baralipne sâwuap. Otmu nâmâ yâk yeñgât kunyeñe sâm katnekmu ya galemyongomune orowâk mansain.”

Yawu sâop.

14 Otmu lohimbi nenñeâmâ hânân yuân mansain yakât otmâ Anitâñe ikñe nanñe bulâñe Yesu himbimâmbâ hânğângumu ge lohimbi nengât toсахât otmâ muop. Otmu Anitâñe mumuñambâ mem yahalop yan Satan Mumuhât Amboñe ya mem ge kalop.

15 Yawu gârâmâ nenâmâ mumuhât pat otmâ mansain nânğâm gorâ kakñan manmâ gawin. Otmu yawuâk torokatmâ ki mannehât Yesuñe manman kârikñahât mâtâp mem teteningiop.

16 Otmu Anitâñe anjelolipñe yengât nânğâm Yesu ki hânğânguop. Yâhâmâ nengât sâñ yâk hânğângumu giop. Otmu tâmbânenñe Awarahamñe Anitâhâlen biwiñane kepeim manop nengu yawuâk kepeim manbin. Yakât otmâ tihitnenñe otbe sâñ giop.

17 Otmu Anitâñe wawaenenekmâ tosanenñe pilâningiwe sâñ âi sâñ wañop. Âi sâñ wañop ya mem uârândâñ olâkgât himbimâmbâ ge lok otmâ manop. Otmu sâp yan lohimbi nengât biwi nânğân nânğânnenñe ya mem manop.

18 Otmu nenñe lohotñe otnehât Satanñe perâkñe topñe topñe kâitnongomap yawuâk anğoân yâk kâitguop. Kâitgumu ki lohotñe otmu pilâm ba ariop. Yawu gârâmâ nenñe lohotñe otnehât Satanñe kâitnongomap yan Yesuñe mâmâñe otningimu yâkât wâtñan kinmunñe mem ge katnenekbe sâñ pâpgumap.

3

Yesuñe Mosehât kunñe tatmap.

¹ Bukulipne, yuwu sâmunne nângânet. Anitâne nanne Yesu hângângumu hânân yu giop. Otmu Anitâne mem dâinenekmu Yesuhâlen biwi nângân nângânnenne kepeim konohâk otmâ mansain. Yakât otmâ yâkne mâtâp mem kulet sâningim âwâne Anitâhâlen âwurem yâhâ tatmâ nengât sâm âwâne ulitgumap.

² Otmu Mosenne Isirae lohimbi yengât galem pato man sâm Anitâne âi waņop. Âi waņop ya biwiņane mem tuhum manmâ gaop. Yakât dopņeâk Yesune nengât kunnenne otmâ manbuapgât Anitâne âi sâm waņop ya tem lâuwaņgim manop.

³ Yawu gârâmâ Mose otmu Yesu yetgât topyetne ikņiâk ikņiâk tap yakât nângânetâ keterahâkgât den âlâen hâum sâmunne nângânet. Lok âlâne emet pato ikņiâk tuhumu bukulipņane ekņetâ âlepne nandoroņe otmu yâkât nângânetâ yahatmu mepaemai. Yakât dopņeâk Yesuhât komolipņe, emelâk Mose otmu tâmbâlipnenne manmâ gawi, otmu âun nen yu mansain, otmu hâmbâi lohimbi tetem mannomai nen kerek ikņak menenekmâ kunnenne tatbuap. Yawu tatmu nenne yâkât nângâmunne yahatmu mepaem yâhâmbisâin.

⁴ Yawu gârâmâ den âlâen hâum yuwu sâwe. Emet yaņe ikņak in ki gam yâhâ kinmap. Nenne kât, nak me senne âlâlâ yaņe mem emet tuhumain. Dop yawuâk Anitâne yu ya topņe topņe kalop. Nenne ya ekmâ yanâmâ Anitâhât bât tosa sâm ekmâ nângâmain.

⁵ Otmu Mose yâhâmâ Anitâhât den lâum hoņ bawaņgim manop. Hoņ bawaņgim manmâ yu me ya gâmâlâk tetewuap yakât sâm tetem Isirae

lohimbi ekyongom manop.

⁶ Yâhâ Yesu Anitâhât nanñaje nen hârok nengât kunnenje tatmâ tihitnenje otmap. Otmu yâkñak Mosehât gurâ kunje tatmap. Otmu Anitâje Yesuhât pat kuningiop ya mene sâm Yesuhâlen biwinnenñaje kepeim mannom otmuâmâ pat yakât bulâje ningimu mem Yesu orop tatmâ yâhâmbisâin.

Tâmbâlipnenñaje manman sânduhân ki yâhâwi.

⁷ Yawuhât Anitâje Wâtgât mâmâñahât Heak hângângumu ge lok âlâ ekumu den yuwu kulemuop.

⁸⁻¹¹ “Angoân yambu 40 yakât biwiñan, tâmbâlipyenñaje lok ki manmaiângen ari manmâ kunyeje kârikje otmu nâhât den kum manbi. Yawu otjetâ yâk yengât senyeje hâreahâkgât kulem topne topne memune ekbi. Kulem yawu memune ekmâ nâhât topne nângâwi yamâ biwiyenñaje pâlâmñe otmu manbi. Otmu nâhât den ya nângâm bet pilâm iliwetmâ manmâ gawi. Tâmbâlipyenñaje manman sânduhân ari mannomaihât nângâm, nâje Awarahamgât pat kuwanñiwan. Yamâ nâje den ekyongowan ya ki lâuwi. Yakât otmâ kuk otyingim tâmbâlipyenñaje nâhâlen torokatmâ manman sânduhân ki mannomaihât sâm hâreyiñiwan. Yawu otyingimune hâhiwin kakñan manminiwi. Yeje sâp yiwerenje yuâmâ yakât nângâm nâhât den tem lâunihim biwiyenñaje ki pâlâmñe otmu mannomai. Yawu mannomai otmuâmâ nâhâlen torokatmâ manman sânduhân mannomai.” Yawu sâop.

12 Bukulipne, yeŋe den yu sâlikum topŋe nâŋgâm heŋgeŋgunomai. Yen yawuâk biwiyenŋe orotok sâmu yan manman amboŋe Anitâ ya pilâŋetâ biwiyenŋe bâlemapgât yen galemahom mannomai.

13 Otmu biwiyenŋe pâlâmŋe otmapgât orotmemeyenŋe bâleŋe bet pilâm Anitâhât den tem lâum haonmâ ârândânŋe bukulipyenŋe orop mem hewewenŋe tuhuakmâ tânahom mannomai.

14 Yeŋe biwiyenŋe Kiristohâlen katŋetâ kârikŋeâk kinmâ gaop yawuâk kinmu manmâ yâhânomai. Yawu manŋetâ yanâmâ Kiristonŋe manman kârikŋan mem katyekmu yâk orop tatmâ yâhâmbisâi.

15 Bukulipyenŋe orop mem hewewenŋe tuhuakmâ Anitâŋe den sâmu kulemguop ya nâŋgâm mem mete tuhunomai. Den ya yawu tap.

“Tâmbâlipyenŋe lok ki manmaiângen ari manmâ kunyenŋe kârikŋe otmâ nâhât den kum manbi. Yawu otmâ biwiyenŋe pâlâmŋe otmu manbi. Yakât otmâ tâmbâlipyenŋe manman sânduhân ki mannomaihât sâm hâreyiŋgiwan. Yeŋe yakât nâŋgâm nâhât den tem lâunihim biwiyenŋe ki pâlâmŋe otmu mannomai.”

Den kulemguop ya yawu tap.

16 Yakât yuwu sâmune nâŋgâŋet. Lohimbi girawuyanŋe Anitâhât den nâŋgâwi yamâ biwiyenŋe pâlâmŋe otmu manbi? Yamâ Isirae lohimbi Mosenŋe angoân dâiyekmu Aihita hân pilâm lok ki manmaiângen ari manbi ya.

17-18 Otmu Anitâŋe lohimbi girawuya yeŋgât yuwu sâm hâreyiŋgiop?

“Nâje kuk otyingimune nâhâlen ki torokatmâ manman sânduhân mannomai.”

Yawu sâm hâreyingioop yamâ lohimbi girawuya yengât sâop? Yamâ yuwuhât sâop. Tâmbâlipnennaje lok ki manmaiângen ari manjetâ yambu 40 pesuk sâop. Lok ki manmaiângen manbi yan Anitâhât den nângâjetâ gemu bet pilâwi yakât tosanje meyekmu hiliwahom hâmeyenje gulip olop.

¹⁹ Yakât topje yamâ yuwu nangain. Nengât tâmbâlipnennaje Anitâhâlen biwi nângân nângânyenaje ki kepeim manbi. Topje yakât otmâ Anitâje kuk otyingimu manman sânduhân ki manmâ gawi. Yawu gârâmâ yenje tâmbâlipnennaje otbi yawuâk otmaiât biwiyenje galemahom henjenjum manmâ yâhânomai.

4

Anitâje mem manman sânduhân katnerek-buapgât mâtâp tap.

¹ Anitâje biwinenje mem huruŋ pilâmu sânduhânâk manmâ yâhânom yakât sâm kalop. Yakât otmâ Anitâ nenekmu ki ârândâŋ otmapgât biwinenje galemahom denje biwinenjan katmâ tiŋâk lâum manmâ yâhânom.

² Emelâhâmâ tâmbâlipnennaje Anitâhât den pat âlepje ya nângâwi yamâ yâkâlen biwi nângân nângânyenaje ki kepeim manbi. Yakât otmâ yâkje tatmap yan ki mem dâiyekmu yâhâwi. Yan ki yâhâwi yamâ biwiyenaje ki huruŋ sâmu tatmâ yâhâwi. Nen gurâ yawuâk Anitâhât den pat âlepje ya nângâwin. Yawu gârâmâ tâmbâlipnennaje otjetâ bâleop yawu otmaingât biwi nângân

nângânnenñaje Anitâhâlenâk kepeim lauje lâuwanjim mannom.

³⁻⁴ Yawu gârâmâ nenâmâ yâkâlenâk biwi nângân nângânnenñaje kepeim mansain. Yawu manmâ yâhâmunñe biwinenñe sânduk sâwuap. Yâhâ tâmbâlipnenñeâmâ yawu ki otbi. Yakât otmâ Anitâñe den sâm hâreyiñgiop ya yuwu tap.

“Nâñe den ekyongowan ya ki lâuwi. Yakât otmâ nâhâlen torokatmâ manman sânduhân ki mannomaihât sâm hâreyiñgiwan.”

Anitâñe in tatmâ nângâmap yakât topñe teteâkgât lok âlâñe den yuwu kulempguop.

“Anitâñe hân himbim kândikyotgom âliwahap topñe topñe katmâ arimu hilâm nombolân konok pesuk sâop. Yakât kakñanâmâ in tatmâ nângâop.”

Otmu manman sânduhân orowâk tatmâ nângâne sâm yakât Anitâñe tâmbâlipnenñe dâiyehop. Dâiyekmuâmâ denñe nângâñetâ gemu betbangim yakât bulâñe ki mewi.

⁵ Yakât otmâ Anitâñe den yuwu sâop.

“Nâñe den ekyongowan ya ki lâuwi. Yakât otmâ nâhâlen torokatmâ manman sânduhân ki mannomaihât sâm hâreyiñgiwan.”

Anitâñe yawu sâm hâreyiñgiop.

⁶ Yâhâ tâmbâlipnenñaje den pat âlepñe ya nângâñetâ gemu ki lâuwi. Yakât otmâmâ manman sânduhân ki yâhâwi. Yâhâ nengâlen gâtñe âlâ me âlâñe manman sânduhân yâhâ Anitâ orop manmâ yâhânomgât dop tap. Yawu gârâmâ nenñe yâkâlen biwi nângân nângânnenñaje kepeim den pat âlepñe ya nângâm lâum mannom yanâmâ

hâmbâi Anitâne dâinenekmâ mannom sânduhân katnenekmu manmâ yâhâmbisâin.

⁷Yakât bulâne menomgât mâtâp tap yakât topne yuwu. Tâmbâlipnenne manman sânduhân ki manbi ne hâhiwin kaknan manmâ gawi. Yâhâ yapâ torokatmâ lohimbi tetem gawine gurâ dop yawuâk manmâ gawi. Yâhâ tetem ganetâ ganetâ lok pato âlâ, kutne Dawiti sâm, yâk teteop. Yawu gârâmâ Anitâne Dawiti den yuwu ekumu kulempuop.

“Yene sâp yiwerene yuâmâ nâhât den tem lâunihim biwiyene ki pâlâmne otmu mannomai.”

Dawitine yawu sâm ekyongop yamâ angoân tâmbâlipnenne kunyene kârikne otmâ Anitâhât den kuwi dop yawuâk otbi.

⁸Otmu embânân angoân Anitâhât den kuwi yakât âlâ torokatmâ sâwe. Emelâk Mose mumu lok âlâ, kutne Yosua, yâkne Mosehât gewâknan kinmâ tâmbâlipnenne ya meyekmu hân âlâ, kutne Kanan, yan ari manbi. Yâhâ Yosua ne manop sâp yanâk manman sânduhân mannet sâm Anitâne katyehop mâne yakât kaknan Dawiti manop sâp yan “manman sânduhân mannomai” ki sâm ekyongombâp.

⁹⁻¹⁰Yawu gârâmâ sâp yiwerene yu nenne manman sânduhân manmâ yâhâmbisâingât dop tap. Otmu embânân Anitâne hân himbim kândikyotgom âliwâhap topne topne kalop yakât kaknan in tatmâ nângâop. Dop yawuâk nengu manmâ yâhâmunne Anitâne sâop ya bulâne tetemu yâkâlen torokatmunne ikne orop tatmâ nângânom.

¹¹Yakât nângâm yâkâlen biwinenne tine kepeim manmâ yâhânom. Yawu otmunne

manman sânduhân katnenekmu ikņe orop tatmâ yâhâmbisâin.

Anitâhât denņe nâņgâmunņe biwinenņan hâumu topnenņe mem tetemap.

¹²⁻¹³ Bukulipne, Anitâņe sâmu den kulemguwi ya wonân dop sâwe. Nehemân hâum kinmâ sâwe. Nehemņe lok kambiamņan memap yakât dopņeâk Anitâhât denņe nâņgâmunņe biwinenņan hâum topnenņe mem tetemap. Otmu ikņe senņan misiņguraknomgât dop âlâ ki tap. Nenne tetekņan kinmunņe biwi nâņgân nâņgânnenņe kerek ekmâ nâņgâmap. Ya ekmâ nâņgâmâmâ biwinenņahât topņe sâm tetewuap yakât biwi nâņgân nâņgânnenņe galemguakmâ denņe lâum mannom.

Yesuņe nengât sâm Anitâ ulitgumap.

¹⁴⁻¹⁵ Otmu nen Satanņe mem lohotņe tuhunenekbe sâm nengâlen âi memap. Yâhâ Yesuņe hânân ge manmâ gaop yan Satanņe yawuâk yâk mem lohotņe tuhuwe sâm nep miop. Yawu otmu ki otmâ tâpikguop. Yâkņe kârikņe manmâ Satan mem ge kalop. Yawu gârâmâ nenņe Kutdânenņe Yesu, Anitâ nanņahât denņe lâum mannom. Yawu otmâ manmunņe yâkņe Anitâ orop tatmâ âwâņaņe tepņe nâņgâningim umam sâningiâkgât ulitgumap.

¹⁶ Yawu gârâmâ Satanņe mem ge katnenekbe sâm otbuawân lohotņe otmaingât Anitâ ulitgumunņe mâmâņe otningiwuap. Yâhâ otmunņe bâlewuap otmuâmâ ya sâm tetem ekum yâkâlen biwinenņaņe kepeimunņe kaok nâņgâningim tosa-nenņe pilâningiwuap.

5

Anitâñe tosayeñe pilâyinjiâkgât hotom uwanjiminiwi.

¹ Bukulipne, hotom uminiwi yengât kunje manop yâkât topñe ekyongomune nângâñet. Anitâñe ikñe nângân nângânñe biwinenñan katmu lok âlâ nenñe hohetnenñambâ mem tetewin. Mem tetemunñe Anitâñe tosanenñe pilâningiâkgât lok yañe yâkât senñan kinmâ hotom uminiop.

² Otmu lok ya orowâk Satanñe perâkñe topñe topñe kâitnongomu otmunñe bâlem gaop. Yakât otmâmâ nenñe Anitâhât den ya lâum hâum pâpguwin yan yâkñe tepñe nângâningim lohotñan otningiminiop.

³ Yawu gârâmâ ikñe orotmeme bâleñe otmu nengât orotmemenenñe bâleñe yakât tosa Anitâñe pilâningiâkgât hotom uwanjim manmâ gaop.

⁴ Yâhâ ikñe nângân nângânân âi ya ki miop. Anitâñe topñe katmâ lok âlâ, kutñe Aron, yañe hotom uyinjim tosayeñe pilâyinjiâkgât âi ya sâm wanop. Topñe kalop yapâek manmâ gawi yamâ hotom u u lok ya Anitâñe ikñahâk mem sâlipyongom âi ya yinjim gaop.

Yesuñe nen sârerenenekmâ muop.

⁵ Otmu yawuâk Kiristonñe ikñe engatñeâk ki watmâ olop. Anitâñe âi ya sâm wanmâ hângângumu giop. Yâhâ emelâk ki giop yan Anitâñe den yuwu sâm ekuop ya lok âlâñe kulemguo. Den ya yuwu tap.

“Gâmâ nanne ombe bisine. Yawu gârâmâ yi-wereñe yu yakât topñe sâm teterâ lohimbi

kerekne ya ekmâ nânghânet sâh yakât katgek-san.” Yawu sâop.

⁶ Yawu gârâmâ Anitâne den âlâ yuwu sâh nanne ekuop ya lok yanje kulemguoop.

“Anghoân lok âlâ, kutne Melekiserek sâh, yâkne lohimbi yengât tosayenahât sâh hotom unihiwuapgât âi sâh wanmune mem gaop. Yawu gârâmâ gâne âi ya mem torokat sâh gihimune tuhuh yâhâwuat.” Yawu sâh nanne ekuop.

⁷ Yawu otmâmâ Yesune huruh huruh manmâ âwânahât tem lâuwangim âi ya tuhuh manop. Otmu âwânane mumuhât mâtâwâmbâ membuapgât dop tatbanjiop ya nânghâop. Yâkne ya nânghâm yâkâlen biwinane kepeim yapâ menekbuap nânghâm isem ulitguop. Otmu âwânahâlen biwinane kepeim manop yakât otmâ nânghâwangim mumunambâ mem yahalop.

⁸ Yâhâ Yesune yuwu sâh ki ulitguop. “Nâmâ gâhât nange bulâne mansan. Yakât otmâ umatne âlâlâ nâhâlen tetenihiwuap yamâ sârâ biatbuap,” yawu sâh ki ulitguop. Yawu gârâmâ sâtgum manmâ âwânane âi sâh wanop ya lâum lohohne ki olop.

⁹ Yawu otmâ âi ya biwinane tijâk mem manmu âwânane ekmu ârândâh olop. Yakât otmâ yâkâlen biwinenane kepeim tem lâuwangim manmunne manman kârikjan katnenekbuapgât mâtâp teteop.

¹⁰ Anitâne emelâk Melekiserek âi sâh wanmu mem manop. Âi yawuâk ikne nanne tâh tâh ya wanmu mem yâhâwuap.

Nenneâmâ lepat nânghân nânghânân ki watmâ

mannom.

¹¹ Bukulipne, yuwu sâmunne nângânet. Nâne Yesuhât topne ya kerehâk sâm kusânma ekyongowe sâm oan. Yamâ nângân nângânyene umatne oap yakât otmâ ihilâk ekyongomune nângânetâ ki keterakbuap.

¹² Yâhâ den yan yuâmâ emelâk ekyongowin yamâ yene nângâm heñgenyuwi mâne sâp yiwerene yu bukulipyene kâsikum yingimbâi.

Yamâ yene Yesuhât topne nângâm pâpguwi yakât nângâmune bâleap. Yakât otmâmâ lok âlâne yâhâpne den kâsikum yingiwuapgât dopne tap. Yengât topyeneâmâ yuwu. Yengât nângân nângân yamâ lepat nângân nângân. Lohimbi papato yengât nângân nângân yawuya nângâwi mâne den yan yukât topne âlepne nângâm metembâi.

Yawu gârâmâ topyene teteâkgât den âlâen hâum sâmunne nângânet. Leparâmâ sot nem âkâm yingimunne nemai. Yâhâ sot kândâkdâek ki nemai. Yene Yesuhât komolân torokatbi yamâ nâne ya yengât dop oai. Yamâ girawu otmâmâ lepatne nem âkâm yingimunne nemai yawuâk nemai? Yakât yene topne girawu otmâmâ Yesuhât topne ya topnambâek ki nângâm heñgenyuai? Yene sot kândâkdâek nemai mâneâmâ Yesuhât topne ya nângâm heñgenyumbâi.

¹³ Yamâ yene lepalân manmâ orotmeme kingon me orotmeme âlepne yâhâp yâhâp ya ekmâmâ mem kiwilim topne nângânomaihât dop ki tap. Yamâ otmâ tâpiguai.

¹⁴ Otmu torokatmâ den âlâen hâum sâwe. Lepat yamâ gâmâlâk papato otjetâ sot kândâkdâek yingimunne nemai. Dop yawuâk lohimbi

nombotŋaŋe nâŋgân nâŋgânyeŋe keterakmu Yesuhât topŋe ya ekmâ nâŋgâm denŋe lâum manmâ gainŋe orotmeme âlepŋe me bâleŋe ya ekmâ kiwilim mansai. Lohimbi yawuya yengât nâŋgân nâŋgânyeŋe me manmanyenŋe ya ekmâ nâŋgâmune âlepŋe nanŋe otmap.

6

Anitâŋe nenekmâ ârândânŋ olâkgât biwinenŋe yâkâlen katmâ mannom.

¹ Yakât otmâ den yu yâhâpŋe ki ekyongowe. Anitâ nenekmu ârândânŋ olâkgât nenŋe orotmeme-nenŋe kiŋgoŋ otbin ya bet pilâm sâm tetemâmâ yâkâlen biwi nâŋgân nâŋgânnenŋe katbin. Otmuâmâ yakât topŋe yâhâpŋe ki ekyongowe.

² Otmu âlâmâ yuwu. Toen mem katnenekbi yakât topŋe ki sâm ekyongowe. Me nenŋe kunyenŋan mem kuratgum mem kârikŋe tuhuyekbin, me mumuŋambâ yahatnom, me sâp patoen biwi nâŋgân nâŋgânnenŋahât topŋe ekmâ ikŋiâk ikŋiâk matŋe ningiwuap yakât topŋe gurâ yâhâpŋe ki sâm ekyongowe. Emelâk nâŋgâm metembâihât.

³ Otmu Anitâŋe biwiyeŋe mem kusânâmâ mâmâŋe otnihimu yakât den âlâ âiŋe torokatmâ ekyongowehât nanŋan. Yâhâ yiwerenŋe yuâmâ den umatŋe tap yakât sâmune nâŋgânŋet.

⁴⁻⁵ Lohimbi nombotŋaŋe Kiristohât den pat âlepŋe nâŋgâwi yan yâkât topŋe nâŋgâm heŋgenŋum biwiyeŋe yâkâlen katŋetâmâ himbingât pat kuyiŋgimu mansai. Yawu otmâ Anitâŋe Wâtgât mâmânŋahât Heak hânŋângumu ge biwiyenŋan tatmâ mâmâŋe otyiŋgimap.

⁶ Yawu gârâmâ yakât kakņan Kiristohât hâkân otmâ betgum manņetâ biwiyenę pâlâmņe otbuap. Otmu Anitâ nanņane nengât sâm muop yakât nâņgâņetâ tâņât otbuap. Yawu nâņgâm manmâ yâhânomainę Parisaio Sarukaio yâkņe sâņetâ Yesu mem howanân kum kânâņgâwi yâk yenġât dop otmâ yakât matņe bâleņe menomai. Nâņgân nâņgân yawuya nâņgâm manmâ yâhânomai yakât otmâ biwi nâņgân nâņgânyenę yâkâlen yâhâpņe katnomaihât dop âlâ ki tap.

⁷ Yakât nâņgâņetâ keterahâkgât den âlâen hâum sâmunen nâņgâņet. Hân ambolipņane nep kâmetmâ pilâņetâ iop. Imu yan gelâk gemu hân toņe orop yapâ gâtņane hunsambe teteop. Otmu yapâ sot hâwurum um nem âlepņan manmâ gawi. Yakât dopņeâk lohimbî nombotņane Anitâhât den ya nâņgâm biwiyenjan katmâ yâkât wâtņan kinņetâ yâkņe mâmâņe otyingimu orotmeme âlepņeâk otmai.

⁸ Yâhâ âlâ torokatmâ sâwe. Nep ya kâmetmâ pilâņetâ imu yan hewukņane lâum kurihimu languop yamâ orok sâop. Yakât dopņeâk lohimbî nombotņane anġoân biwiyenę Kiristohâlen katmai. Yakât kakņan Anitâhât den ya nâņgâņetâ tâņât otmu pilâņetâ yâk yenġâlen bulâņe âlepņe ki tetemap. Yâhâmâ orotmemeyenę âlepņe ya pilâm orotmeme bâleņe otmâ manmai. Yawu otņetâ Anitâņe nâņgâmu bâlemu hâhiwin kakņan mannomai sâm hemġât pat kuyingimu manmai.

⁹⁻¹⁰ Bukulipne, yuwu sâmunen nâņgâņet. Yenę ki otmâ tâpikgum hiliwahonomai. Yawu gârâmâ Kiristohâlen biwiyenane kepeim manņet sâm biwinane hikum mansan. Yenâmâ Anitâhât tem

lâum buku konok oranjim manmâ gai. Yawu oai yamâ Anitâne yekmu ârândân oap. Yakât otmâmâ yengât nângâm biwine pâlâmne ki otmâ pilâyekbuap. Biwiyene Kiristohâlen katbi yakât otmâ biwiyene orotok sâmapgât Anitâne mâmâne otyingiwuap.

¹¹ Yawu gârâmâ yene biwiyene Yesuhâlen iknjiâk iknjiâk katmâ denne lâum orotmeme âlepne otmâ manmâ gai. Yakât otmâ yawuâk torokatmâ manmâ yâhânetgât nanngan. Yâkâlen biwiyenane kepeim manmâ yâhânomai yanâmâ Anitâne manman kârikjahât pat kuyingimu tap yakât bulâne yingimu menomai.

¹² Yawu gârâmâ manman kârikjahât pat yakât bulâne menom sâmbiwiyene ki orotok sâmu mannomaihât nanngan.

Yesune kulet sâmbâtâp tiripnongop ya tânj tânjâk watnom.

¹³ Biwiyene orotok sâmapgât yuwu sâmune nângânet. Awoņnenne Anitâ yâhâmâ topne âlâ. Lok me wuân me wuânne Anitâhât kunne manbuapgât dop bia. Yawuhât emelâk embânân Anitâne tâmbânenne, kutne Awaraham, yâkât nângâwanngim pat kuwanngiop sâp yan Anitâne ikne kutne ahonakmâ den ya sâmbârikne tuhumbuwu ekuop.

¹⁴ “Gâhât biwihambâ kâu pato kândâkdâne hurunduņ sânomai.” Yawu sâop.

¹⁵ Awarahamne den ya nângâm biwi yâhâp ki otmâ manop yakât bulâne miop. Otmu den sâop yakât bulâne yamâ nen yiwerene tetem mansain yu.

16 Anitâñe ikñe kutñe ahonahop yakât topñe nâñgâñetâ keterahâkgât yuwu sâmune nâñgâñet. Nenñe “Wuân me wuân otnom” sâmmain yan bukulpnennñe nengât “lok paha” sâmaihât yuwu sâmmain. “Anitâhât senñan wuân me wuân otnom, yawu sâmunñeâmâ kârikñe otmap.” Yawu sâmmain. Yawu sâmmain yamâ yakât bulâñe ki otmain yanâmâ Anitâñe yakât matñe umatñe ningiwuap nâñgâmain.

17 Yawu gârâmâ Anitâhât komolân gâtñe âlâ me âlâñe den sâm kalop ya nâñgâñetâ bonñe olâkgât nâñgâm ikñe kutñe ahonakmâ den ya sâm kârikñe tuhuop.

18 Otmu Anitâñe den perâkñe sâm kâitnongowuapgât dop âlâ ki tap. Me biwi yâhâp otbuapgât dop gurâ ki tap. Yawuhât yâkâlen biwinennñe kepeim manmunñe tihitnenñe otmâ himbimgât pat kuningiop yakât bulâñe ya bulâñanâk ningimu menom yakât ki gorâningimap.

19-20 Yesu Âwâñe tihitnenñe otmâ manman kârikñan katnenekmu mannongât yâkâlen arimu orowâk tatmawot. Orowâk tatmutâ emelâk Melekiserekñe Anitâñe lohimbî yengât tosayeñe pilâyinñiâkgât sâm ulitguop dop yawuâk Yesuñe nengât sâm Âwâñe ulitgumap. Yakât nâñgâm yan engat yâhâp ki otmain. Bulâñanâk himbimgât pat kuningiop yakât bulâñe menom sâm biwinennñe hikuakmâ manmâ yâhânom.

7

Melekiserek yâkât topñe

1 Lok âlâ, kutņe Melekiserek sâġ, yâkât topņe sâġ tetemune nâġġet. Melekiserek yâġmâ kapi âlâ, kutņe Salem, yapâ ġâtņe. Yâġ lohimbiņe yu ya Anitâġât pat kuwaġiwi ya mem Melekiserek waġbi. Kândikum emelâk kapam tetemu Awarahamņe ikņe kapam loklipņe dâiyekmu ari kapi nombotņe hawamġum tatbi yakât ambolipņe yongom itit kiom bâleņe tuhuyekmâ yâk yengât noniġ bulimakao, lama, senņe âlâlâ topņe topņe ya meyiġiwi. Meyiġim purik sâġ âwuremu Melekiserek orop mâtâwân eġkmâ parahuakmâ Melekiserekņe heroņe otbaġim yuwu sâġ ekuop. “Anitâ kunnenņe tatmaņe mâmâņe otġihimu lohimbi yengât kunyeņe manbuat.” Yawu sâġ ekuop.

2 Yawu sâġ ekumu Awarahamņe senņe âlâlâ meyiġiwi ya nombotņe mem hioġmâ yakât sâsâġambâ konok mem Anitâġât pat kuwaġim Melekiserek waġop.

Otmu kut Melekiserek yakât topņe yuwu tap, “Manman âiloġo loġo amboņe,” yawu. Otmu kapi kutņe, yamâ Salem, yakât topņe yuwu tap, “Biwi sâġduk amboņe,” yawu.

3 Yâġ Melekiserek ikņe hep torehenlipņe yengât kutyene ki tap. Otmu sâġ girawuyaen teteop me muop yakât topņe ġurâ yawuâk ki naġgain. Yakât dopņeâk Anitâġât nanņe Yesu embâġâmbâek tatmâ ġaop. Otmu yawuâk tatmâ yâġawuap. Yakât otmâ dopyetņe konohâk oap. Nâġġamune yawu oap.

4 Melekiserek yamâ lok tâġât bia. Awaraham yamâ Isirae nengât tâmbâġât lok kutdâ manop.

Yâhâ kasalipņe yongom senņe âlâlâyeņe meyiņgimâmâ nombotņe mem hionmâ yakât sâsâņambâ konok mem Melekiserek waņop. Yawu gârâmâ yuwu sânom. Bulâņanâk Melekiserekņe Awarahamgât kunņe manop.

⁵ Yawu gârâmâ yakât kakņan Awarahamgât hâkuņe lok âlâ manop, kutņe Lewi sâm, yâkât komolân gâtņe Anitâhât hotom um manbi. Yâk yeņgât sâm Moseņe girem den yuwu kulemguo.

“Lewi senņe hotom um manmâ yâhânomai. Otmu Isirae lohimbi nombotņe yu me ya yeņe sâsâņambâ konok mem Lewi sen yiņginomai.” Yawu sâm kulemguo.

⁶ Yâhâ Melekiserek yamâ Awarahamgât komolân gâtņe bia. Yakât otmâmâ Awarahamņe senņe âlâlâ mem Melekiserek waņmu yâkņe yuwu sâm ekuop. “Anitâņe mâmâņe otgihimu kunyeņe manbuat.” Yawu sâm ekuop.

⁷ Yakât otmâ topyetņe girawu nâņgânom? Âlâņe kunņe manop? Melekiserek yâkņe me, me Awaraham yâkņe? Yakât yuwu sâwe. Awarahamņe Anitâhât pat kuwaņgiop ya mem Melekiserek waņop. Yakât otmâmâ Melekiserekņe Awarahamgât kunņe manop. Nâņgâmune yawu oap.

⁸ Otmu torokatmâ yuwu sâwe. Senņe âlâlâ yu me ya yeņe sâsâņambâ kâsikum konok mem Lewi sen yiņgiminiwi. Otmu Lewi sen mum gawi ya yeņgât topyeņe yamâ kulemguwi. Yâhâ Melekiserek yâkât topņeâmâ ki kulemguwi. Topņe yakât otmâ Melekiserekņe hotom uminiwi ya yeņgât kunyeņe manop. Nâņgâmune yawu oap.

⁹⁻¹⁰ Otmu Lewi sen manbi ya gurâ ki tetetjetâek

Awaraham Lewihât hâkuŋe yâkŋe Melekiserek senŋe âlâlâ ya waŋop. Yawu gârâmâ Lewi sen yâkŋe Awaraham yâkâlebâ tetem torokatmâ gawi yâkŋeâmâ yawuâk waŋbi.

Bulâŋe ki teteop yakât otmâmâ Anitâŋe Lewi sen yamâ mem ge katyehop.

¹¹ Lewi sen yengâlebâ lok kunŋe âlâ, kutŋe Aron, Mose imiŋe. Otmuâmâ Anitâŋe âiyenjahât topŋe ya sâm tetem Mose ekumu kulemgup den ya lâum hotom um manmâ gawi. Hotom um manmâ gawi yapâ manman kârikjahât bulâŋe ki teteop. Ki tetemu Anitâŋe Lewi sen yengât nâŋgâmu kakŋe olop. Nâŋgâmu kakŋe otmu lok topŋe âlâ, ikŋe nanŋe Yesu hâŋgângumu ge manman kârikjahât mâtâp mem teteningiop.

¹² Otmu Lewi senŋe hotom u uhâk mâtâp watminiwi ya pesuk sâek sâm yâkŋeâmâ emelâk aŋgoân Anitâŋe Melekiserek âi sâm waŋop ya torokatmâ tuhuop. Tuhum pesuk pilâm manman kârikjahât pat yakât bulâŋe mem teteningiop.

¹³⁻¹⁴ Yawu gârâmâ kutdânenŋe Yesu yâhâmâ Yura sen yapâ gâtŋe. Yawu gârâmâ Mosenŋe Yura sen yengât hotom um mannomai sâm ki ekyongop. Yakât otmâ Yura ambonŋe âlâŋe hotom ki uop, bia kârikŋe.

¹⁵⁻¹⁶ Yâhâ, Yesuŋeâmâ gem Melekiserek yâkât âi ya torokatmâ mem manop yakât nâŋe yuwu nanŋan. Anitâŋe Lewi sen yâk yengât orotmemeyenŋe yakât nâŋgâmu tâŋât otmu yanjak benŋe nanŋe hâŋgângumu ge nengât sâm muop. Mumuŋambâ yahatmâ Âwâŋe Anitâhâlen yâhâmu tawot. Tatmâ nengât sâm ulitgumap.

17 Yakât Anitâŋe nanŋe ekumu lok yaŋe den kulemguop ya yuwu tap.

“Angoân lok âlâ, kutŋe Melekiserek sâŋ, yâkŋe lohimbi yengât tosayenahât sâŋ hotom unihiwuapgât âi sâŋ waŋmune mem gaop. Yawu gârâmâ âi ya sâŋ gihimune gâŋe torokatmâ tuhumm yâhâwuat.” Yawu sâop.

18-19 Otmu yuwuhât sâop. Emelâhâmâ Lewi senŋe topŋe katmâ Mosenŋe den kulemguop ya lâum hotom um orotmeme topŋe topŋe otmâ manmâ gawi. Yamâ benŋe yâk yengâlen bulâŋe âlâ ki teteop. Otmu yaŋe tânnongowuapgât dop âlâ ki teteop. Yakât otmâ Anitâŋe nâŋgâmu ki ârândân otmu nanŋe Yesuŋe mâtâp âiŋe meningiâkgât hâŋgângumu giop. Gem âi sâŋ waŋop ya tuhumm pesuk pilâm âwâŋahâlen âwurem yâhâmu orowâk tawot. Yakât otmâ nenŋe biwinenŋaŋe hewewen otmu Anitâ orop den alahunomgât mâtâp teteningiop. Yakât nâŋgâm yâkâlen biwinenŋaŋe kepeim manmâ yâhânom. Yâhâ Yesuŋe mâtâp âiŋe mem teteningiop yakât topŋe ikŋiâk tap yakât torokatmâ âlâ sâwe.

20-21 Angoân Lewi senŋe topŋe katmâ hotom une sâŋ âi ya mewi sâp yan Anitâŋe yâk yengât den âlâ ki hikuop. Âi ya in topŋe katmâ mewi. Yâhâ Anitâŋe ikŋahâk den hikumm nanŋe âi sâŋ waŋop. Anitâŋe den hikumm nanŋe ekuop ya lok yaŋe yuwu.

“Anitâŋe den yuwu sâŋ hikumm ya kârikŋe olop.

Âi ya sâŋ gihimune gâŋe torokatmâ tuhumm yâhâwuat.” Yawu kulemguop.

22 Otmu kândikum Mosenŋe Lewi sen âi sâŋ yinŋimu mem gawi ya pesuk sâop. Yâhâ Yesuŋe An-

itâhât senŋan âi ya memap yamâ ki pesuk sâwuap. Yakât bulâŋe tetewuapgât nâŋgâm enŋat yâhâp ki otmâin.

²³ Otmu âlâ sâwe. Lewi senâmbâ gâtŋe lok dondâŋe âi ya mem mum gawi. Mum gaŋetâ yâk yengât tepyeŋe kâlehengâtŋe nep ya torokatmâ mem gawi. Otmu ya yawuâk âi mem yaŋak mum gawi.

²⁴ Yâhâ Yesuŋeâmâ mumu ki pesuk sâop. Yesu yamâ mum yahalop. Yahalop gârâmâ yâhâpŋe ki mumbuap. Otmu âi miop ya yawuâk mem yâhâmbisâp. Yakât otmâ yâkŋe Lewi sen kerek yengât kunyeŋe tatmap.

²⁵ Yakât otmâ Anitâŋe umam sâningiâkgât nenŋe biwinenŋe yâkâlen kepeim manmâ yâhâmunŋeâmâ Yesuŋe tihitnenŋe otmâ âwâŋe ulitgum yâhâwuap. Yanâmâ âwâŋe nen den âiân katnenekbuapgât dop ki otbuap.

²⁶ Yesuŋe konok sâreerenekbuapgât dop. Yâkât topŋe ikŋiâk tap. Yâhâmâ uwawapŋe bia manmâ tosa âlâ ki olop. Yawuhât âwâŋe Anitâŋe mu-muŋambâ mem yahalop. Mumuŋambâ yahatmâ himbimân yâhâmu orowâk tawot.

²⁷ Otmu torokatmâ sâwe. Lewi senŋe, aŋgoânâmâ yeŋe tosayeŋe Anitâŋe pilâyinŋiâkgât hotom uminiwi. Otmu yakât kakŋanâmâ Anitâŋe lohimbî yengât tosa pilâyinŋiâkgât nâŋgâm hotom uminiwi. Yâhâ Yesuŋe dop yawuya ki olop. Yâhâmâ tosa bia manmâ gam muop. Otmu yamâ ikŋahât otmâ ya ki olop. Yakât bulâŋeâmâ yuwu teteop. Nengât tosa ya âwâŋe pilâningiâk sâm ikŋak nengât sâm mumu ârândâŋ olop. Yawu

gârâmâ nengât sâm yâhâpņe mumbuapgât mâtâp
âlâ ki tetewuap.

²⁸ Otmu yakât den pâņe tâlâwâk âlâ sâmune
nâņgâņet. Anġoânâmâ Moseņe âi yakât topņe
kulemgum kalop ya watmâ Lewi sen âi ya sâm
yiņgimu mewi. Yâhâ lok biwi nâņgân nâņgânnenņe
yamâ bâleņe, nen hârokņe otmâ tâpikgum tosa
mem gamain. Yâhâ Moseņe âi sâm yiņgimu
mem manmâ gawi yakât kakņanâmâ Anitâņe ikņe
nanņe âi sâm waņmu miop. Yâhâ Anitâ nanņahât
topņeâmâ ikņiâk tap. Yâkņe âi ya mem târârâhâk
manmâ gam muop. Otmu mumuņambâ yahatmâ
himbimân yâhâmu âwâņe orop tawot. Yakât otmâ
âi miop yakât bulâņe tetewuapgât nâņgâm enġat
yâhâp ki otmain.

8

*Anitâņe den hâņņe pilâm yan âiņe ya mem
kârikņe tuhuop.*

¹ Otmu den kulemguan yukât topņe yamâ yuwu
tap. Nengât Kutdânennņe yamâ Yesu. Nennņe yâkât
topņe nâņgâm heņņeņguain. Yâhâmâ âwâņe him-
bimân tatmap yâk orop dopyetņe konohâk.

² Emelâk anġoân tâmbâlipnennâņeâmâ hotom
u uhât selep tuhuwi yan Anitâņe tosayeņe
pilâyiņgiâkgât hotom um gawi. Yâhâ sâp yiwerene
yuâmâ Anitâ nanņaņe âwâņe orop tatmâ âwâņe
tosanenņe pilâningiâk sâm ulitgumap.

³ Yâhâ Moseņe den topņe kulemgum kalop
ya Lewi senņe lâum Anitâņe tosa pilâyiņgiâkgât
lama me nâi me âlâlâ ya gâim katmâ hotom um
gawi. Yâhâ Yesuņeâmâ lama me âlâlâ ya ekmu

tâjât otmu ikņe manmanņe ki alitmâ kawenennan kinmu kuņetâ muop.

⁴ Mum yahatmâ himbimân yâhâmu âwâņe orop tatmâ âi ya mem tatmap. Yâhâ hânân yuân Lewi senņe Yura ambolipņe yeņgât girem den watmâ Anitâņe Yura lohimbi yeņgât tosa pilâyinģiâkgât âi mem mansai. Yakât otmâ Anitâ nanņaņe torokatmâ nep membâpgât gewâk ki teteop.

⁵ Lewi senâmbâ gâtņaņe hotom u u emetņan yâhâm âi topņe topņe yan memai. Yâhâ yakât bulâņeâmâ himbimân Anitâ tatmawân tap. Otmu anģoân emelâhâmâ Moseņe hotom um yâhâminiwi yakât selep kuņet sâm topņe kalop yanâmâ Anitâņe yakât topņeâmâ yuwu sâm tetem ekuop.

“Gâ emelâk Sinai pumņan yâhâ sâp kâlep manon yan himbimân nâhât kawine tap ya tiripgohomune ehon. Yakât otmâ ekyongorâ ya dop kum kuņet.” Yawu sâm ekuop.

⁶ Yawu gârâmâ Kutdânenņe Yesu ikņak himbimân yâhâm nenņe lohotņe otmaingât âwâņe Anitâ ulitgum tatmap. Yakât otmâ yâkņe Lewi sen kerek yeņgât kunņe tap. Otmu âlâ sâwe. Moseņe den sâm teteop yakât bulâņe ki teteop. Yâhâ Anitâņe ikņe nanņe hâņgâņgumu ge den eknongop yamâ bulâņe teteop.

⁷ Yâhâ Mosehât girem den yakât bulâņe âlepņeâk tetem gaop mâneâmâ Anitâ nanņahâlen kulem bulâņe teteop yu ki tetembâp.

⁸⁻⁹ Yawu gârâmâ Anitâņe Mose ekumu den kulemguop yamâ kerehâk ki lâuwi. Ki lâuņetâ Anitâņe nâņgâmu bâlemu yakât den âlâ yuwu sâm

hikuop yakât topņe sâm tetemu poropete âlâņe kulemguop ya yuwu tap.

“Anġoânâk nâņe Isirae lohimbi Aihita hânâmbâ dâiyekmâ taka girem den ya yingim yâk orop den hikuwan. Yawu ġârâmâ yâkņe den ya hâkâņ otmâ kuwi. Yakât otmâ nâku yawuâk yengât hâkâņ otmâ betyongoan. Yakât otmâmâ hâmbâi sâp âlâenâmâ Awarahamġât sen, komot yâhâp, Isirae yet Yura, yâk orop den hikumune yaņe kârikņe tatmâ yâhâwuap.

10 Otmu den topņe yamâ yuwu. Sâp âlâenâmâ den mâtâpņe anġo hikuwom yakât bulâņe yamâ nâņe biwiyenjan kâmetbom. Otmu nâņġân nâņġânyenjan kulemgumune tatmâ yâhâwuap. Yawu otmâ nâņe yâk orop tatmâ tihityenņe otmâ yâhâmbisân.

11 Sâp yanâmâ lok yahat yahatņe me lok geheņe, kutyenņe orop me kutyenņe bia, ya kerehâkņe nâhât topņe topņambâek nâņġânomai. Yakât otmâ nâhât topne ki pâpġum âi pâi tuhanġinomial.

12 Otmu sâp yanâmâ nâņe yengât tosa me orotmeme bâleņe yakât matņe ki yingiwom. Nâņe umam sâyingim otņetâ bâlem ġaop yakât yâhâpņe ki nâņġâwom.” Anitâņe yawu sâop.

13 Otmu yakât yuwu sâwe. Den yakât bulâņe yawu tetewuap. Otmu anġoân Anitâņe den hikuop yakât Moseņe kulemguop ya bulâņe ki teteop. Yakât otmâ dop kum yuwu sâmunne nâņġâņet. Nak âlâ esenņaņe ġimbanġum mum beretek sâm ġemap yakât dopņeâk den yaņeâmâ bialop. Yawu ġârâmâ Anitâņe den âiņe hikuop yakât bulâņe

tetem henḡenḡuwuap.

9

Emelâhâmâ orotmeme yuwu otmâ Anitâ mepaeminiwi.

¹ Otmu emelâk Anitâḡe girem den ya tâmbâlipnenḡe yinḡim yâk orop den hikuop sâp yanâmâ orotmemeyenḡe topḡe topḡe otmâ manḡetâ ârândânḡ olâkgât Anitâḡe yakât topḡe Mose ekumu kulemguop. Otmu âlâmâ hotom ya girawu unomai yakât topḡe ya gurâ yawuâk sâm tetem ekuop.

² Yâhâ hotom uminiwi selep yakât topḡeâmâ yuwu. Anḡoânâhâmâ hotom uminiwi yaḡe âiyenḡe tuhuḡetâ kâtâpyongoâkgât sânḡum kâlep ya hikunḡetâ ge sârârârâk kinop. Otmu kawe yakât kutḡeâmâ “Anitâ sâm mepaenom,” yawu kunbi. Yawu gârâmâ lohimbi nombotḡe in manmainḡe ya kâlehen yâhâmai sâm samut katbi. Otmu kâlehen yamâ lambe saum katminiwi yakât kawe. Otmu banḡa um yan Anitâhât pat kuwanḡim mem yâhâ katminiwi yakât kawe.

³ Yâhâ yakât kâlehenâmâ sânḡum âlâ kâlep pato ya yawuâk hawamḡum katmâ hikunḡetâ ge hârândânḡâk kinop. Otmu kawe yakât kutḡeâmâ “Anitâhât welâmḡe,” yawu sâm kunbi. Yawu otmâ Anitâḡe yan ge tatmap nânḡâm Lewihât komot kunyenḡe yâkḡak yan yâhâminiop.

⁴ Otmu alata âlâenâmâ sot hotomḡe topḡe topḡe uminiwi yakât kawe. Alata yamâ goliḡak tuhuwi. Otmu Mosenḡe emelâk girem den tapeân kulemguop ya mem yakât emetḡe goliḡak tuhum

katjetâ talop. Otmu âlâmâ angoân Aihita hân pilâm lok ki manmaiângen taka manjetâ yan Anitâne sot âlâ, kutje mana sâ, ya yingiminiop yakât nombotje yamâ belo âlâ golinjak tuhum katbi yan mânunmâ katjetâ tatminiop. Otmu âlâmâ Arongât howan ya emelâk elelek sâ kulem olop ya. Ya yâhâp yâhâp mem hâwurum tapeân Moseje kulenguop ya orop konohân katjetâ tap.

⁵ Otmu yakât kakjanâmâ anelo yâhâp yetgât umutyetje yamâ golinjak tuhum yan kânângâyelekjetâ kinminiowot yamâ yuwu nângâwi. “Anitâne yâk yetgât hohetyetjan ge tatmâ tihitnenje otmap. Yakât ikje lanjinje pato ya je yâk yetgât hohetyetjan tetemu ekmain.” Yawu nângâwi. Yawu nângâm yan hotom uminiwi yâk yengât kunyenaje nonin bulimakao hepje tuangumu geminiop. Otmu den yu ekyongomune kâlep kâlep olâkgât ki nanjan. Yawuhât tâlâwâk sâwoman.

⁶ Otmu tâmbâlipnenaje yu me ya otnehât nângâwi. Yamâ Lewihât komolân gâtje ya je kawe âlâ, kutje “Anitâ sâ mepaenom,” yan hilâm ârândânâk yâhâm lohimbi kerek belângen manbi yengât sâ Anitâ ulitgum mepaewi. Otmu lohimbi je yu me ya Anitâ wannehât nângâwi yamâ mem kawe yan katmâ gawi.

⁷ Otmu hotom u u yakât kawe, kutje “Anitâhât welâmje” yan hotom um gawi ya yengât kunje, lok konohâk je, yâhâmâmâ ikje, otmu bukulpnje nombotje, otmu Isirae lohimbi kerek yâk je otmâ tâpikgum manbi ya kerek yengât tosa ya Anitâne pilâyingiâkgât yan yâhâop. Otmu yambu konok yakât biwiñan hilâm konohâk Anitâhât kawenjan

yâhâm noniņ bulimakao lokņe kum ya hepņe tuañguminiop.

8-9 Otmu Anitâhât Wâtgât mâmânahât Heakņe biwi nânġân nânġânnenņe mem hewewenġ tuhumu yakât topņe yuwu nânġâwin. Hotom uminiwi yakât kawean lohimbi kerehâkņe ki yâhâminiwi. Yawu nanġain. Otmu Lewihât komolân gâtņeņe âiyeņe tuhumi yan Anitâņe ya ekmâ tep âlep nânġâyinġiâkgât ya otminiwi. Yamâ ya ekmâmâ yuwu nanġain.

10 Orotmemenenņe âlâlâ yu me ya ki orotņe sâmi kuanġiwin, me ki neņet sâmi, me ki meņet sâmi undip karanġiwin ya ihilâk lonġemâmâ otmâ tâpikguminiwin. Otmunņe bâleminiop yakât tosa Anitâņe pilânġiâkgât hep tuañguminiwi. Hep tuañguminiwi yaņe tânnongom manman mem teteningimbâpġât dop ki talop. Yaņeâmâ orotmemenenņe bâleņe ya ekmunņe teteâkgât yawu otminiwin. Yawuâk torokatmâ otmâ ganġetâ Anitâņe nânġâmu ki ârândânġ olop. Yawu ġârâmâ yâkņe biwinenņe ekmâ nânġâm ikņe nanņe tâņ tâņâkņe mâtâp âiņe menġiâkgât hânġângumu ġiop. Gem yan hotom uminiwi yakât bonņe yamâ yâkņe mem teteop.

Yesuņeâmâ mâtâp âiņe mem teteningiop.

11 Otmu yakât topņe nânġâm henġenġuņetġât torokatmâ yuwu sâmune nânġâņet. Hânân yuân hotom u uhât selepņe tuhuwi yan Yesuņe ki yâhâm hotom ya uop. Bia kârikņe. Yâkņeâmâ himbimân yâhâm âwâņe Anitâ orowâk tatmâ manman kârikņe yakât pat kuningim yakât bulâņe nenņe menehât alahum tatmawot.

12 Otmu âlâ yuwu sâwe. Hotom um gawi ya yenġât kunġaġeâmâ noniġ bulimakao ġaim hep ya mem sâġgum kâlep mem yahatmâ kâlehen bamin-iop. Bam yan Anitâhât welâmġan hep tuangumu kakġan geminiop. Yesu Kiristoġe yawu ki olop. Yâkġeâmâ kawenennġan kinmu kuġetâ muop yan ikġe hepġaġe tosanennġe piringiopi. Yâkġe yawu otmâ Anitâhâlen yâhâm sâreerenenehop. Yawu olop yakât otmâ nennġe yâkât manmanân torokatmâ manmâ yâhânom.

13 Yâhâ emelâhâmâ yuwu otminiwi. Lohimbi âlâ me âlâġe lok mumuġe wâimai sâm Lewihât komolân ġâtġaġe samut katminiwi. Yâhâ lohimbi âlâ me âlâġe wâinomai yanâmâ Lewihât komolân ġâtġaġe bulimakao nanġe ġaim uġetâ sem kou otminiop. Kou yaġe mem lok mumuġe wâiop yâkât hâkġan samut ya biatbaġġiâġġât moseleminiwi. Otmu âlâmâ hotom um yan yuwu nâġġâminiwi. “Yâkġeâmâ noniġ bulimakao ġâiġetâ yakât hepġaġe gem yan nennġe manman âiġoġo loġgo me tosa bia mannehât gem piriap,” yawu nâġġâm yan otminiwi.

14 Yuâmâ Kiristo yâkġe ġiop. Yamâ Anitâhât Wâtġât Mâmâġahât Heak embâġân âlâlâ ki tetemuâk tatmâ gamap yaġe mâmâġe otbaġġimu tosa bia manmâ gam kawenennġan kinmu kuġetâ mum yan ikġe hepġe ġiop. Yawu otmâ biwi nâġġân nâġġânnennġe hewewenġ otmu Anitâhât tem lâum hoġ bawâġġinehât manmunġe bâlem gaop yakât tosa yamâ konohâk pirimu biatmâ meteop. Yakât otmâ logġât orotmeme tâġât ya pilâm biwi nâġġân nâġġânnennġaġe yâk konok hikum yâkât

pat manmâ yâhânom.

¹⁵ Otmu torokatmâ sâwe. Anitâne dâinenekmâ manman kârikne yakât pat kuningim den hikuop yakât bulâne menehât Kiristone nengât sâmuop. Mum yan otmunne bâlem gaop yakât Anitâne matne umatne ningimap sâmu yakât manman kârikne yakât mâtâp âine mem teteningiop. Otmu emelâk Lewi sen yengât amutgen manmâ mâtâp ya watmâ otmunne bâlem gaop yakât tosa ya Yesune pilâningim sârenehop.

Mosenje noniŋ bulimakao hepne mem tuangguop.

¹⁶⁻¹⁷ Otmu nenne orotmemeâmâ yuwu tap. Umatne âlâlâ yu me ya teteningimu munomân senne âlâlâ yuwu yawuya miaknomai yawu sâmâmâ nan baralipnenne yamâ bâtnenne bâine yakât pat kuyiŋgimain. Otmu den ya sâmu pat kuyiŋgimain yakât bulâne yamâ orowâk manmâ yâhânomân yan bonne ki teteyiŋgiwuap. Nen mumunne yakât kakŋan bulâne yamâ âlepne miaknomai.

¹⁸ Yakât dowâk Anitâne angoânâmâ den ya sâmu hikuop yakât bulâne teteâkgât Mosenje den ya kulemgum inâk ki kalop. Yuwu otmâ kalop.

¹⁹ Yâkne pepa mem lohimbi komot pato yanje Anitâhât den ya topŋambâek nângânetâ keterahâkgât ekyongomu nângâwi. Otmu den sâop yakât bulâne ya tetem henŋenŋuâkgât yâkne noniŋ bulimakao hepne ya to orop menduhum memâmâ tuangumu pepaen giop. Tuangumu gemu nak bêt bêtne mem losohomâmâ sângum âlâ mem yakât potonŋan kepeim hewân kalop. Katmu hewâk pato

otmuâmâ den ya sâ̄m teteop yakât bulâ̄ne teteâ̄kgât hep tuan̄gumu lohimbi kerek kakyeñan giop.

²⁰ Yawu ekmâ top̄ne nân̄gân̄etgât yuwu sâ̄m ekyongop.

“Girem den Anitâ̄ne sâ̄m hikuop ya lâ̄um man̄netâ bulâ̄ne teteyiñgiâ̄kgât hep yuâmâ mem tuan̄guan. Yakât top̄ne ekmâ nân̄gâm heñgeñgunomai.” Yawu sâ̄m ekyongop.

²¹ Otmu yawuâ̄k wahap yu me ya Anitâ̄ne nân̄gâyñgiâ̄kgât sâ̄m katbi ya kakñan gurâ hep mem tuan̄gumu giop.

²² Otmu den kârik̄ne emelâ̄k kulemguop yakât top̄ne yuwu tap. Noniñ bulimakao me âlâlâ ki gâim hep̄ne lâ̄um moseleñetâ geminiop yanâmâ tosayeñe yawuâ̄k tatminiop. Yâhâ lâ̄um moselewi yanâmâ Anitâ̄ne tosayeñe pilâm umam sâyñgiopgât mâtâp ya teteyiñgiop.

Yesuñe nengât toсахât otmâ mumu ârândân̄ olop.

²³ Otmu Moseñe hep ya mem sen̄e âlâlâ ya kakñan tuan̄gumu giop ya ârândân̄ olop. Yâhâ yiwereñe yuâmâ sen̄e âlâlâ hep yañe tuan̄guop yakât bon̄e himbimân tap. Yakât hep tuan̄guop yañe bulâ̄ne ki olop. Yakât otmuâmâ heñgeñguâ̄kgât Yesuñe himbimân yâhâop.

²⁴ Yawu gârâmâ Anitâhât kawe bulâ̄ne ya himbimân tap yakât Yesuñe yuân hânân in selep kum yan yâhâ hotom uwi yan ki yâhâop. Yâk̄neâmâ himbimân yan yâhâop yanâmâ yâk̄ne nen̄e lohot̄ne otmaingât âwân̄eñe mâmâñe otningiâ̄k sâ̄m ulitgum tatmap.

²⁵ Otmu torokatmâmâ âlâ yuwu sâ̄mune nân̄gân̄et. Hotom um gawi ya yeñgât kunyeñeñe

yambu ârândânâk yâhâ noniņ bulimakao me âlâlâ hepņe lâum tuanġuminiop. Yâhâ Kiristoņe yambu ârândân ki mum hepņe gemap. Yâhâmâ sâp konok kuņetâ muop yan hepņe gemu ârândân olop.

²⁶ Yawu gârâmâ Kiristoņeâmâ yâkņe otminiwi yawu ki olop. Yawu olop mâne emelâk embânân lohimbi kândikyotgop yapâek yambu ârândân kuņetâ mum hepņe gembâp. Yâhâ yâkņeâmâ ya ki olop. Âwânaje tosanenņe pilâm umam sâningiâkgât mâtâp âiņe mem teteningim kawenennan kinmu sâp konok kuņetâ muop yan ikņe hepņanak nengât tosanenņe pirimu ârândân olop.

²⁷ Otmu Anitâņe sâop yakât nen munom yakât kakņan biwinenņe ikņiâk ikņiâk ekmâ nânġâm topnenņe mem tetewuap. Mem tetemâmâ otbin mewin yakât matņe âlâku ikņe ambo ambo ningimu menom.

²⁸ Yakât otmâ lohimbi nengât tosa ya bialâkgât Anitâņe nânġawanġimu Yesuņe nengât tosaġât otmâ muop. Mumu ârândân sâop gârâmâ Yesuņe yâhâņe mumbuapġât dop âlâ ki tap. Emelâk mumu otmu ârândân olop. Yakât otmâmâ nenņe biwi nânġân nânġannenņe yâkâlen katmâ manmunņe yanâmâ yâkņe den âiân yâhâņe katnenekbuapġât dop ki otbuap. Yâhâ nenņe biwi nânġân nânġannenņe yâk kepeim manmunņe taka menenekmu orowâk ari manmâ yâhânom nânġâm biwinenņe yakât mem mambotbanġim mannom.

Emelâhâmâ hep tuanguminiwi yamâ imbiâk otminiwi.

¹ Otmu emelâk Anitâne den âlâlâ Mose ekumu kulemguop ya lâum hotom uminiwi ya yengât kunje âlâne yambu ârândânâk hotom uminiwiân noniņ bulimakao me âlâlâ hepne mem yâhâ tuanguminiop. Yakât otmâ lohimbine tosayeņe ya bunewâk pesuk sâyiņgimu Anitâhâlen torokatnomai yakât mâtâp ki teteop. Yâkâlen torokatne sâm pâpguwi.

² Yâhâ sâp yan tosayeņe ya pesuk sâop mâne hotom uwi yakât kakņan âi ya yâhâpne torokatmâ ki membâp. Otmu tosayeņe ya emelâk bialop mâne manman sânduuhân manbâi.

³⁻⁴ Yawu gârâmâ otņetâ bâlem gaop yakât nelâm yongomapgât yambu ârândânâk hotom uminiwi ya yengât kunyene noniņ bulimakao yakât hepne mem yâhâ tuanguminiop. Yawu otņetâ manmâ gawi yamâ tosayeņe yakât nâņgâmâk manmâ gawi.

⁵⁻⁶ Otmu tosayeņe yawuâk tatyņgimu manmâ gawi yakât Kiristone âwâne Anitâ den yuwu sâm ekuop ya poropete âlâne kulemguop.

“Anitâ, Kutdâne, gâmâ noniņ bulimakao me âlâlâ ya gâim hotom uņetâ nâņgârâ ya bonņe ki otmap. Otmu hep mem tuangum mansai yakât nâņgârâ bonņe ki otmap. Otmu sot um gâhât pat katmai yakât gurâ nâņgârâ tâņât otmap.

⁷ Yawu gârâmâ nâņeâmâ lok otmâ hoņ bahihim gâne den tâņ tâņâk lâum yan yakât bonņe memune ârândân otbuap.” Yawu sâop.

Yawu sâam yan Yesu Kiristoŋe himbim pilâm ge den yakât bulâŋe ya mem teteop.

⁸ Yâhâ den yakât topŋeâmâ yuwu tap. Anŋoân Kiristoŋe den yuwu sâop.

“Gâmâ yâkŋe noniŋ bulimakao ya gâim hotom umai, me hepŋe mem tuanŋuŋetâ gemap, me sot um gâhât pat sâam katmai ya kerek ekmâ nânŋârâ bulâŋe ki otmap.” Yawu sâop.

Yawu otmâ Isirae lohimbiŋe Anitâhât den bi-wiyenŋe ki kepeim lâum gawi, imbiâk lâum gawi yakât Anitâŋe nânŋâmu bâleop.

⁹ Kiristoŋe den sâam teteop yan torokatmâmâ den âlâ yuwu sâop.

“Nâŋeâmâ hoŋ bahihim gâhât den tâŋ tâŋâk lâum yan yakât bonŋe memune ârândânŋ otbuap.” Yawu sâop.

Yawu otmâ Anitâŋe den âlâlâ Mose ekumu kulemuŋop ya lâum hotom uminiwiŋe yakât bulâŋe ki mewî. Yakât otmâ Anitâŋe bonŋe teteâkgât sâam nanŋe Yesu Kiristo hânŋâŋumu ge muop.

¹⁰ Yesu Kiristoŋe ikŋe manmanŋe ki alilop. Yawu otmâ Anitâŋe âi sâam waŋop ya lâum manmâ gam muop. Yakât otmâ tosanenŋe kerehâk pilâningimu nenŋe Anitâhât senŋan aŋun bia manmâ yâhânômŋât mâtâp ya sâam ningiop.

Yesu kuŋetâ hepŋe gemu ârândânŋ olop.

¹¹ Bukulipne, den yu yâhâpŋe torokatmâ sâawe. Anitâŋe nenekmu ârândânŋ olâk sâam Lewi senŋe noniŋ bulimakao gâim hep tuanŋum âlâlâ tâtâemâk otmâ gawi yakât bulâŋe ki teteop.

12 Yawu otmâ gañetâ Anitâñe tosanenñe pilâningiâkgât Yesuñe nengât kawenenñan kinmu kuñetâ muop. Yawu otmâ yanâmâ manman kârikñahât bulâñe ya teteop. Yawu otmâ muop gârâmâ yâhâpñe mumbuapgât mâtâp ya ki tap. Emelâk ya otmu ârândân olop. Otmu mum yahatmâ Anitâhâlen yâhâ tat tat kârikñe tatmâ yâhâmbisâp.

13 Anitâñe Satan bâleñe otmu kasa nombotñe mansai ya kerek hilipyongom mem ge katyekbuap yakât Yesuñe mambotmap.

14 Otmu sâmunne nâñgâñet. Yesuñeâmâ mum yahalop yâkâlen nenñe biwinenñañe kepeim manmain. Yawu otmunñe Anitâñe tosanenñe kerehâk pilâningimu ikñe senñan salehâk manmâ yâhânom.

15 Otmu yukât topñe teteâkgât Anitâhât Wâtgât mâmâñahât Heakñe topñe ya sâm tetemu poropete âlâñe kulemguoop ya yuwu tap.

16 “Kutdânenñañe yuwu torokatmâ sâop. Sâp âlâenâmâ den mâtâpñe ango hikuwom yakât bulâñe yamâ nâñe biwiyeñan kâmetbom. Otmu nâñgân nâñgânyeñan kulemgumune tatbuap.”

17 Yawu sâmâmâ yuwu torokatmâ sâop.

“Nâñe yengât tosa me orotmeme bâleñe yakât matñe ki yingiwom. Umam sâyingiwom. Yawu otmâ yakât yâhâpñe ki nâñgâwom.”

Kutdânenñañe yawu sâop.

18 Otmu “Umam sâyingiwom yakât kakñan otñetâ bâlem gaop yakât yâhâpñe ki nâñgâwom,” yawu sâop. Yawu gârâmâ Lewihât senñe hotom uminiwi ya yanâk pesuk sâop.

Anitâje pat kuningiop yakât bulâje menehât nângâm manmâ yâhânom.

¹⁹ Bukulipne, den sâm tetean yu nângâm hengenjumâmâ topne yuwu nângânomai. Emelâhâmâ Anitâhât kawé ya sângumje hikum manğuminiwi. Yamâ himbimân manman tap yakât umutje.

²⁰⁻²¹ Yâhâ yakât bulâjeâmâ nengât sâm Yesu howanân kujetâ mumu hepje giop. Otmu mum yahalop. Yâkje kunnenje otmâ kulet sâningim Anitâ âwâjahâlen yâhâop. Yawu otmâ yâkje sângum ya gahaem pilâm Anitâhâlen yâhânomgât mâtâp ânje mem kusâningiop.

²² Yawu gârâmâ yakât kakjan nen yuwu sâwin. “Emelâk tosanenje ya bialop.” Yawu sâmunje toen mem katnenehop yakât nângâm biwi yâhâp ki otnom. Yawu otmâ Anitâhâlen haonmâ ârândâj biwi nângân nângânnenje kepeim yâk mepaem manmâ yâhânom.

²³ Otmu Anitâje den perâk ki sâmapje emelâhâk manman kârikje yakât pat kuningiop yakât bulâje mene sâm yâkâlen biwi nângân nângânnenje kepeim mannom. Yawu otmâ engat yâhâp ki otnom.

²⁴ Yawu otmâ bukulipnenje orop biwi nângân nângânnenje kepeiakmâ konohâk otmu mem hewewenju tuhuakmâ buku konok orangim manmâ yâhânom.

²⁵ Lohimbi nombotje lohote otmâ ki menduhuakmâ Anitâ mepaem mansai. Nenneâmâ yâkje otmai yawu ki otnom. Kutdânenje Kiristone sâp girawuân taka menenekbuap yakât nângâm nenje menduhuakmâ Anitâ mepaem yâkâlâk

nângâm mannom.

26 Yakât torokatmâ sâwe. Den pat âlepne ya nângâm heñgenyum Yesuhâlen biwinenñaje kepeim manmâ gain. Yawu gârâmâ nenñe lohotne otmâ orotmemenenñe bâleñe ya mem miwirikum torokatmâ otmâ yâhânom. Yawu otnom. Otmuâmâ Anitâñe tosanenñe pilâningiâkgât yâhâpne kuñetâ mumbuapgât dop âlâ ki tetewuap. Bia kârikne.

27 Yâhâ nenñe orotmemenenñe bâleñe ya miwirikum yâhâpne torokatmâ otmâ mannom otmuâmâ Anitâñe matne umatne ningiwuap. Yawu otmâ hemân pilânenekmu gemunne kâlâpne senenekmu hâhiwin kakñan manmâ yâhâmbisâingât mâtâp tap.

28 Yakât yuwu torokatmâ sâwe. Emelâhâmâ orotmeme yuwu otmâ manbi. Lok âlâ me âlâñe Mosehât girem den ya loñgâenomai otmuâmâ lohimbi yâhâp me kalimbu yañe yakât topne ekmâ nângâm ya sâm tetenjetâmâ papatolipyenñe yuwu sâminiwi. “Ya bulâñanâk orotmeme kiñgoñ ya otmâ mansap.” Yawu sâm yakât matne in yawu yongoñetâ muminiwi. Orotmeme yawu otmâ manbi.

29 Yakât otmâmâ yuwu torokatmâ sâwe. Anitâ nanñe nengât tosanenñahât otmâ kawenennñan kinmu kuñetâ mumu hepne giop. Yakât nângâñetâ bulâñe otmu lohimbi âlâ me âlâñe yâkâlen biwiyenñe katmâ mannomai. Yawu gârâmâ yakât kakñan nângâñetâ tâñât otmu betgunomai. Yawu otmâ Anitâhât Wâtgât Mâmâñahât Heak ikñahâk mâmâñe otyiñgim tihityenñe otmap ya gurâ yawuâhâk betgunomai. Lohimbi yawu manmâ

yâhânomai yamâ Anitâ ikɲak matɲe umatɲe yingimu mem yanak hem nâpumân kionnomai.

³⁰ Emelâhâk emet inânɲan topɲe tetemu eknehât Anitâɲe den sâm tetemu poropete âlâɲe kulemguop ya yuwu tap.

“Ninak matɲe yingimune mem umatɲe kakɲan mannomai.”

Otmu âlâmâ yuwu sâm tetemu poropete âlâɲe kulemguop.

“Anitâ ikɲe lohimbilipɲaɲe denɲe nâɲgâɲetâ gemu betbaɲginomai yâk den âiân katyekmâ topyene mem tetewuap. Topyene mem tetem matɲe mem purik pilâyingiwuap.”

Yâkɲe yawu otyingimu hâhiwin nâɲgâm manmâ yâhânomai.

³¹ Yen yawu otmaihât yuwu sâmune nâɲgâɲet. Anitâ manman amboɲaɲe sâmû hâhiwin kakɲan manmaihât kiɲgityeɲahât ki oai, hâ? Yawuhât nâɲgâm denɲe lâum manɲet.

³² Yakât topɲe yuwu sâmune nâɲgâɲet. Yeɲe topɲe katmâ biwiyene Yesuhâlen katbi. Yawu otmâ topɲe ya nâɲgâm heɲgeɲguwi. Yawu otmâ biwiyene yâkâlen hikum lâum manmâ gaɲetâ lohimbi belângen mansaiɲe mem bâleyekbi. Mem bâleyekɲetâ hâhiwin kakɲan manmâ gawi.

³³ Otmu lohimbi belângen mansai nombotɲaɲe yeɲgâlen takam lok sensenân kinmâ senyeɲan gem yongom mem ge katyekmâ girinyingwi. Yawu gârâmâ yeɲeâmâ yakât sâm yâk yeɲgât senyeɲan lohotɲe ki otbi. Otmu kasalipyene bukulipyene yawuâk otyinginetâmâ yanâmâ yâk yeɲgâlen torokatmâ tânyongowi.

34 Yâhâ bukulipyenê nombotjê yamâ mem pâi emetjê kâlehen katyekjetâ manbi yâk yengâlen ari sot um yingim tânyongowi. Yâhâ lohimbi belângen mansaijêâmâ senjê âlâlâ wuân me wuân tatyinjioop yamâ kombo meyingiwiân yanâmâ ki gorâyingioop. Yenâmâ manman kârikjahât pat Anitâjê kuyinjioop yakât bulâjê yamâ kombo meyinginomaihât dop âlâ ki tap. Yakât nângâm manmâ gam biwi yâhâp ki otbi.

35 Yakât otmâmâ topyêjê yuwu nângâm henjengunomai. Yenâmâ emelâk gihityenê ya kârikjê olop. Yawu gârâmâ umatjê topjê topjê teteyinjioop otmuâmâ kârihem manman kârikjahât pat kuyinjioop yakât bulâjê menehât nângâm mannomai.

36 Yawu nângâm Yesuhâlenâk biwi nângân nângânyenêjê kepeim manmâ Anitâhât tem lâuwangim yakât bulâjê ya menomai.

37 Yakât yuwu torokatmâ sâwe. Anitâjê sâmu poropete âlâjê emet inânjan den kulemguoop ya yuwu tap.

“Takawuap yanê kâlep ki otmâek benjê takawuap.

38 Otmu yêjê biwiyenê nâhâlen katjetâ manman kârikjahât pat kuyinjioop. Yakât otmâ ki lohotjê otmâ biwiyenê houj sâwuap. Yenâmâ pat kuyinjioop yakât bulâjê menomai. Yawu gârâmâ yengâlen gâtjê âlâ me âlâjê mambotjetâ kâlep otmu biwiyenê orotok sâmu betnohonomai otmuâmâ lohimbi yawuya yengât nângâmune bâlemu umatjê kakjan katyekmune mannomai.”

Yawu kulemguoop tap.

39 Yawu gârâmâ yâkjê mansai yan ki torokatmâ

mannomai. Yâhâmâ Anitâhât den ya nângâñetâ gemu betbañgiwi yakât matñe yâkñe ikñiâk ikñiâk kâpekyiñgiwuap. Yâhâ yeñeâmâ yawu ki otmâ mansai. Yakât otmâ biwi nângân nângânyene Anitâhâlenâk katñetâ kinmu yâk konok mepaem manñetâ Anitâñe meyekmâ manman kârikñan katyekbuap.

11

Anitâhât den nângâñetâ bulâñe olop yâkñeâmâ biwi yâhâp ki otbi.

¹ Bukulipne, yuwu sâmune nângâñet. Anitâhâlen biwinenñane kepeimunñe kinmâ yâhâekgât nângâm mannom. Yakât topñe yuwu ekyongomune nângâñet. Anitâñe den sâop yakât bonñe yamâ tetewuap. Yakât otmâ nenñe Anitâhât den yakât nângâm engat yâhâp ki otnom. Teteningiwuap nângâm biwinenñane nângâmunñe bulâñe otbuap.

² Emelâk tâmbâlipnenñe nombotñane Anitâñe den ekyongop ya nângâñetâ bulâñe otmu yakât engat yâhâp ki otbi. Yawu otbi yakât otmâ Anitâñe nângâyinñimu ârândân olop.

³ Embâñân topñe katmâ Anitâñe sâmu hân himbim âlâlâ topñe topñe biaembâ teteop ya nenâmâ bulâñanâk ki ekmâ manbin. Otmuâmâ nenñe Anitâhâlen biwinenñane kepeiwin yamâ Anitâñe yu ya olop yakât den pat sâm teteop ya nângâmunñe bulâñe dondâ oap. Den sâm teteop ya nângâm biwi yâhâp ki otmâ manmâ gain. Otmu yakât topñe nângâñetâ keterahâkgât emelâk manbi yâk yenğât topyene ekmâ nângâne.

⁴ Yawu gârâmâ tâmbânenņe âlâ, kutņe Awe sâm, yâkņe Anitâhâlen biwi nâņgân nâņgânņaje kepeim manop. Yawu manmâ sâp âlâen lama nanņe gâim Anitâhât hotom uop. Yawu otmu Anitâņe yâkât nâņgâmu ârândâņ olop. Otmu ataņe, kutņe Kain sâm, yâkņeâmâ Anitâhât den ya nâņgâmu bulâņe ki olop. Yakât otmâ yâkņeâmâ sot inņe hâwurum hotom ya umu Anitâņe ekmu ki ârândâņ olop. Yakât otmâmâ kâiņe tepņan tâlimu imiņe kumu muop. Yâhâ imiņajeâmâ Anitâhâlen biwiņaje kepeim pat kuwaņgiop yakât bulâņe hâmbâi membom nâņgâm manop. Yawu gârâmâ nenņe Anitâhâlen biwi nâņgân nâņgânnenņaje kepeim yâkņe olop yawuâhâk otmâ manmâ yâhânom.

⁵ Yâhâ lok âlâmâ, kutņe Enoko sâm, yâkņeâmâ Anitâhâlenâk biwi nâņgân nâņgânņaje kepeim manop. Yawu manmâ gamu Anitâņe yakât nâņgâwaņgimu âilonņo olop. Yakât otmâ ki muop. Anitâņe golâek memmu yâkâlen yâhâop. Yawu otmâmâ bukulipņajeâmâ “Enoko ya wosaken arap,” sâm pâinņetâ bialop.

⁶ Yawu gârâmâ yuwu naņgain. “Anitâ ya bulâņanâk tap. Yakât otmâ nenņe yâkâlen biwinenņaje kepeine sâm otmunņeâmâ yâkņe âlepņe nâņgâningiwuap.” Yawu naņgain. Yawu gârâmâ nenņe yâkâlen biwinenņaje kepeim manmunņe yanâmâ yâkņe nenekmu ârândâņ otnap.

⁷ Otmu dop yawuâk lok âlâ, kutņe Noa sâm, yâkņe Anitâhâlen biwi nâņgân nâņgânņaje kepeim manop. Yakât otmâ Anitâņe tonņelâk pato takawuap sâm inânņan ekuop. Ekumu yâkâlen biwi nâņgân nâņgânņaje kepeiopgât otmâ

engat yâhâp ki olop. Yawu otmâmâ biwiŋaŋe yuwu nâŋgâop. “O yuâmâ nen kerek hiliwahom metenomosain.” Yawu nâŋgâm yan waŋga tuhuop. Waŋga tuhum ikŋe hepŋe torehenlipŋe ya hârehâk waŋgaen yâhâwi. Waŋgaen yâhâŋetâmâ tonjelâk pato gem to niŋ niŋ sâm gam lohimbi biwi pâlâmŋe manbi ya aksihâk haranyongop. Yawu gârâmâ Anitâŋe den ekuop ya Noaŋe nâŋgâmu bulâŋe otmu yâkâlen biwi nâŋgân nâŋgânŋe kepeim denŋe lâuoŋ. Yakât otmâ Anitâŋe nâŋgâwaŋgim manman kârikŋahât pat kuwaŋgiop

⁸ Yâhâ âlâmâ yuwu. Anitâŋe Awaraham ekum hân âlâ yakât pat kuwaŋgiop. Yakât pat kuwaŋgimu Awarahamŋe yâkâlen biwi nâŋgân nâŋgânŋaŋe kepeim denŋe lâum kapiŋe pilâm kapi âlâengen ariop.

⁹ Ari mem tetem yuwu nâŋgâop. “Hâmbâi nâhât senŋe yuân manmâ yâhânomai yakât bonŋe hân yu mian.” Yawu nâŋgâm emet bulâŋe ki tuhuop. Selep kandi kum yan manop. Yawu manmu nanŋe, Isaka sâm, otmu sesenŋe, Yakop sâm yâku yawuâk selep kandi kum yan manmâ gawi. Yâhâ Awaraham, Isaka, Yakop yâkŋe yuwu nâŋgâwi. “Hâmbâi nengât sen hân yuânâk manmâ yâhânomai,” yawu nâŋgâm yan yanâk manmâ gawi.

¹⁰ Yâhâ Anitâŋe Awaraham den ekuop yakât bulâŋe hâmbâi tetewuap nâŋgâm yâkâlen biwiŋaŋe kepeim manop. Otmu Anitâŋe kapi âlepŋe nandoroŋe sâop yakât bulâŋe himbimân tetewuap yakât gurâ nâŋgâm manop.

¹¹ Otmu Awaraham imbiŋe, kutŋe Sara, yâk gurâ yawuâk biwiŋaŋe Anitâhâlenâk kepeim manmâ

gaop. Saraje kâsiâk manmâ gam sombo olop. Yâhâ embânjan emet inânjan Anitâje yuwu sâm ekuop. “Hâmbâi nange tetewuap.” Yawu sâm den ekuop ya nângâmu bulâje olop. Yakât otmâ sombo olowâke yamâ benje sombonjahât nanje, Isaka sâm, ya mem ga kalop.

¹² Yâhâ Awarahamâmâ sombo dondâ otmâ mu-muhât sâp emelâk wangiop. Yawu manowâke yamâ benje yâkne Anitâhâlen biwiñaje kepeim yâkât den lâum manmâ gaop. Yakât otmâmâ nen yâkât sen mansainje tetem yanâk torokatmâ manmâ gain yu. Yawu gârâmâ nen Awarahamgât biwiñan gâtne lok yamâ saru sâtñan sak ekmain yakât dop mansain. Otmu pitu kiñgitne orowâk ewan kinmu ekmain yakât dop yawu.

¹³ Lohimbi kutyeje yongonmâ aran yuñeâmâ Anitâje den sâop yakât bonje ya hâmbâi tetewuap nângâm yâkâlen biwiyeñaje kepeim manmâ gam muwi. Otmu den sâop yakât bulâje yamâ manbi yan ki mem tetewi. Ki mem tetemâmâ yuwu nângâwi. “Nen kandi mansain,” yawu nângâm biwiyeje ki giop. Otmu enjat yâhâp gurâ ki otbi.

¹⁴⁻¹⁵ Lohimbi yu yan Anitâhâlen biwi nângân nângânyeñaje kepeim manmâ, “Nen kandi mansain,” yawu nângâm kapi âlâhât pat kuyiñgiop yakât bulâje tetewuap sâm manmâ gawi. Yawu gârâmâ “Nen kandi mansain,” yawu sâwi yamâ hânyeje tâmbâje yakât nângâm ki sâwi. Yakât nângâm sâwi mâne purik sâm âwurem ari kapi pilâm takawi yan manbâi.

¹⁶ Yawu gârâmâ Anitâje himbimân kapi âlepne nandoroje yakât pat kuyiñgiop ya ambokunom nângâm denje lâum mem mete tuhum manbi. An-

itâhât den tem lâum manmâ yan, “Anitâ Ambo-nenŋe,” yawu sâm mepaem manbi. Yakât otmâ Anitâŋe nânġâyinġimu ârândân olop.

17-18 Otmu Awaraham yâkâlâk âlâ torokatmâ sâwe. Emelâk embânân Anitâŋe Awaraham yuwu sâm ekuop. “Isakahât biwiŋambâ gâhât seselipge hurunduŋ sânomai.” Yawu sâop. Yawu sâop yakât kakŋan Awarahamgât topŋe tetemu ekbehât An-itâŋe ekumu ikrŋe nanŋe kumu mumu yâkât hotom umbe sâm nanŋe dâim ariop.

19 Dâim arimâmâ biwiŋaŋe yuwu nânġâop. “Nane ombe bisine konok yu kumune mumbuap. Kumune mumu yanâmâ Anitâŋe mumuŋambâ mem yahatmu manbuap yakât wâtŋe tatbaŋgiap.” Yawu nânġâm yanâmâ hotom ya umbe sâm nanŋe dâim ariop. Otmu hâmbâi Anitâŋe sâmu lok mumuŋambâ yahatnomai ya nânġâm kinmâ nanŋe mem alata kakŋan kalop. Katmu tatmu emelâk tewetŋe mem hâuwe sâm inanaŋgumu yanâk Anitâŋe kuwaŋgiop. Emelâk muowâke yamâ nanŋe mem pilâm ariowot. Yawu.

20 Yâhâ Isakaŋeâmâ Anitâhâlen biwi nânġân nânġânŋaŋe kepeim manop yakât otmâmâ yâkâlêmbâ nanyâhâtŋe yâhâp teteowot, kutyetŋe Yakop yet Esau sâm, emet inânŋanâk Anitâŋe sâmu teteyitgiwuap yakât pat kuyitgiop.

21 Otmu Yakopŋe yawuâk biwi nânġân nânġânŋaŋe Anitâhâlen kepeim biwi yâhâp ki otmâ manop. Yakât otmuâmâ emelâk sombo otmâ kâmgum talop yan Anitâ mepaem nanŋe Yosepgât nanyâhâtŋe ya pat kuyitgiop.

22 Otmu Yosepŋe mumbê sâm otmâmâ Anitâŋe

Isirae lohimbi Aihita hânâmbâ mem dâiyekbuap yakât emet inânñan seselipñe yuwu sâm ekyon-gop. “Hâmbâi mâne yengât sen tetem sambe otmâ mannomai. Yawu otñetâ Anitâñe yupâ mem dâiyekmu ari yengât hân sâm pat kuyiñgiop yan mannomai. Yakât otmâ nâmâ mumbom gârâmâ arinomial yan nâhât hahitne mem ari yan kuri-hineknomial.” Yawu gârâmâ yâkñe ki biwi yâhâp otmâ sâop.

²³ Torokatmâ Mosehât sâwe. Mose âwâñe mâmâñañe Anitâhâlen biwi nâñgân nâñgânyetñañe kepeim manowot. Yakât otmâmâ Aihita yengât lok pato, kutñe Parao sâm, yâkñe yuwu sâop. “Isirae ambolipñe yengât nanlipyeñe ñaña ya yongonñetâ muñet,” yawu sâop. Yawu sâmu Mose âwâñe mâmâñañe nanyetñahât kun kundenñe ekmutâ âlepñe otmu Paraohât den ya kum yuwu sâowot. “Nannetñe yu hâmbâi lok pato otbuap.” Yawu nâñgâmâmâ nanyetñe lâum ari âlâengen manmutâ emetsenñe kalimbu pesuk sâop. Yakât kakñan saka saka kâlehen katmutâ to kakñan yolon yolon otmâ talop. Otmu saka saka kâlehen tatmâ isem tatmu Parao baratñañe toen arim yanjak mem teteop. Yâkñe mem tetemâmâ ñaña ya mem ari golemguop.

²⁴ Yawu otmu Mosenje pato otmâ Aihita yengât lok kunñe pato otbuap yakât nâñgâmu gemu pilâyekmâ bukulpñe yengâlen yâhâpñe torokatmâ manop.

²⁵ Yâk yengâlen torokatmâ umatñe topñe topñe teteyiñgiuwap yakât nâñgâm ki gorâwanñgiop.

²⁶ Yâhâmâ Anitâñe pat kuyiñgiop yakât bulâñe tetewuap yakât nâñgâm yâk yengâlen torokatmu

orowâk manbi. Otmu Kiristo yamâ Anitâñe hângângumu ge manmu nângâm bâlewangim âlâlâ otbañgiwi dop yawuâk otmâ manop. Yawu manmâ gam Aihita ambolipñe Anitâ betbañgim hâk sânduhân manmâ gawi yâk yengâlen torokatmâ tosa meman sâm kut miop yakât nângâmu tâñât olop.

27 Yawu otmâ Anitâñe pat kuyiñgiop yakât nângâmu bulâñe olop. Nângâmu yawu otmu Aihita yengât patoyeñahât kiñgitñahât ki otmâ âi ya pilâop. Yawu otmâ yapâ pilâyekmâ lok ki manmaiângen ari manop. Yan manmâ “Anitâ Ambonenñe ki ekmain yamâ bulânñanâk tatmap,” yawu nângâm kârikñeâk manmâ biwi yâhâp ki otmâ manop.

28 Yawu gârâmâ Anitâñe ekmu ârândân otmu yâk hângângumu purik sâm Aihita hânân âwurem ariop. Yan ari Anitâñe ikñe añelone âlâ, kutñe Itit kiom Amboñe sâm, yâk hângângumu Aihita kapi ambolipñe yengât nanlipyeñe kunne ya yongomu munomaihât yakât topñe ekuop. Ekumu nângâm biwi yâhâp ki olop. Otmu añelo yañe buku otningiâk sâm yâkât denñe lâum lama gâim hepñe yañe kâsikum yingimu emetyeñahât gahatñan mem lâwâlewi. Yuâmâ inânñanâk Anitâñe Mose den ekuop ya nângâmu bonñe otmu ya watmâ olop.

29 Otmu “Anitâñe den sâop ya bonñe tetewuap,” nângâm Isirae lohimbiñe Aihita hân pilâm saru gulñe, kutñe Saru Kuriñ sâm, yakât sâtñan ari kinbi. Yan kinñetâ Anitâñe sâmu to ya keterakmâ torehen torehen otmu mâtâp teteop. Yawu otmu kâiyeñe hân liñmâ nombotgen bawi. Nombotgen

banjetâ Aihita yengât hep bero yâku yawuâk be-tyeñan watyekmâ bawi. Tânâmñan bam tatñetâ Anitâñe sâmu saru yañe tunj sâmu gam lâum gulip tuhuyekmu haranyongop.

³⁰ Otmu Anitâñe den ekyongop yakât bonñe tetewuap sâmu ya nâñgâñetâ bulâñe olop. Yawu gârâmâ manbi yañe kapi âlâ, kutñe Yeriko sâmu, yan kasalipyenñe pañ kârikñe sâhâm yeñe yakât kâlehen tatbi yan takawi. Yan taka Isirae ambolipñe Anitâhât den lâum pañ kârikñe ya hawamgum yâhâm gem tatñetâ hilâm nombolân yâhâp pesuk sâop. Hilâm nombolân yâhâp ya pesuk sâmu yanâk pañ ya aksihâk ge liwarakmâ iop. Yawu otmu Isirae ambolipñe kasalipyenñe ya yâhâ yongom metewi.

³¹ Yawu otbi. Yâhâ yawu ki otbi yan mâtâp imbi âlâ manop, kutñe yamâ Lahap. Anjoân Isirae lok yâhâp hâñgânyotgoñetâ emet galemñe ekde sâmu yâhâm giowot. Otmu imbi yañe yuwu nâñgâop. Isirae ambolipñe ki nohonomai nâñgâm lok yâhâp hâñgânyotgowi ya kapi ambolipñe yelek-mai sâmu mem mesangutyelehop. Imbi yañe biwi yâhâp ki otmâ mesangutyelehopgât otmâ yâhâ yongowi sâp yan imbi ya konok hâmeñe kinop. Yawu.

³² O, bukulipne, den sâmune dâiakmâ kâlep otmapgât den pânje tâlâwâk sâwe. Tâmbâlipnenñe nombotñe Anitâhât den yakât bulâñe tetemu menom nâñgâm manmâ gawi ya yengât kutyeñe yuwu. Gition, otmu âlâmâ Barak, âlâmâ Samson, âlâmâ Yepita, otmu âlâmâ Dawiti, âlâmâ Samue, otmu Anitâhât poropetelipñe nombotñe.

³³ Lok yongonsan yuâmâ Anitâñe den sâop ya

nângâñetâ bulâñe olop yakât otmâmâ biwi yâhâp ki otbi. Yawu otmâ kasalipyenñe yongom itit kiom tuhuyekbi. Yâhâ yâk yengâlen gâtñe nombotñe yamâ meyekmâ pusi papato sâtñe kârikñe, kutñe laion sâm, ya tatmaiân pilâyekñetâ gewi. Yamâ Anitâñe mâmâñe otyiñgimu mem pâlâmñe tuhuyekñetâ ki neyekbi.

³⁴ Yâhâ nombotñe âlâmâ mem pilâyekñetâ kâlâp kâlehen kionñi. Yamâ ki seyehop. Yâhâ nombotñe âlâmâ kasalipyenñe tenğâen kinbi yakât nâñgâm gem kewewetmâ ariwi.

³⁵ Yâhâ naom yâhâp muowot yamâ Anitâñe sâmu yâhâpñe yahatmutâ heronje otbi. Yâhâ nombotñe âlâmâ kasalipyenñe mem âlâlâ tuhuyekñetâ hâhiwin kakñan manmâ yuwu sâwi. “Âo, hâmbâi sâp patoen mumuñambâ yahatmâ heronje kakñan manmâ yâhânom. Yakât ki gorâningiâk.” Yawu sâm Anitâhât den ya tâñ tâñâk lâum kinmâ muwi.

³⁶ Nombotñeâmâ kasalipyenñe meyekmâ senyen gem yongom mem âlâlâ tuhuyekbi. Yâhâ nombotñeâmâ tâk kârikñe mem sâhâyekbi. Yâhâ nombotñeâmâ lâm kâlehen panyekñetâ ge yaken tatbi.

³⁷ Nombotñe yamâ kasalipyenñe kâtñe yongonjetâ muwi. Nombotñeâmâ seheñe mem pâñ lâu lâu hâreyekbi. Nombotñeâmâ tewetñe enğatyenñe hâum tiñ tâñ meyekbi. Yâhâ nombotñeâmâ kasalipyenñe meyekmai sâm yan hâkyenñe alitmâ ari hewukñehen mesañgurakbi. Nombotñeâmâ sot me senñe âlâlâhât pâinmâ in po manbi. Yawu gârâmâ lohimbi belângen manbiñeâmâ yâk yekmâ mem bâleyekñetâ manbi.

³⁸ Anitâhât kasalipnaje yawu otyingwi. Yawu otyingim yâk watyeknetâ gem tiok taok otmâ âlâengen âlâengen ari manbi. Yawu otmâ ari lok ki manmaiângen, me dikin kâlehen, me bârâengen ari yan manmâ gawi.

³⁹ Lohimbi yuñeâmâ Anitâhâlen biwi nângân nângânyenaje kepeim den sâop yakât nângâm biwi yâhâp ki otmâ manmâ gawi. Yakât otmâ yekmu ârândâñ otmu manman kârikjahât pat kuyingiop.

⁴⁰ Yawu gârâmâ Anitâhât lohimbi yaje hionjakmâ nombotnaje kulet sâyngim yenjiâk bulâñe menomaihât dop ki tap. Yawu nângâm pat ya kuyingimu nengât tâmbâlipnennaje manmâ gawi yamâ bonñe ya in yawu ki mewî. Yawu gârâmâ nen orowâhâk manman âlepñan manmâ yâhânóm.

12

Anitâñe ikñe nanñe baratñe sâm menenehop.

¹ Bukulipne, yuwu sâmune nângâñet. Nengât tâmbâlipnennaje Anitâhât den nângâñetâ bulâñe otmu yâkâlen biwiyenaje kepeim manmâ biwi yâhâp ki otmâ manmâ gam muwi. Yakât nângâm den âlâen hâum sâmune nângâñet. Tâmbâlipnennaje kurâp kinmâ hawamnongom nenekmâ tai yakât yengu yâkñe Anitâhât den lâum ki lohotñe otmâ gawi yanâk torokatmâ mannomai. Manmâ biwiyenaje gemu lohotñe otmaiñet orotmemeyenaje bâleñe ya kerehâk bet pilâm hewewen otmâ Anitâhât den lâum yâkâlen biwiyenaje kepeim manmâ yâhânóm.

² Yawu otmâmâ Yesuñe kerek nengât nângâningim manman bâleñahât Amboñe, kutñe

Satan, yâkât bâtnjambâ menenekmâ yâk mem ge kalop. Yakât nângâm Yesuŋe heronje otmâ ki lohotnje olop. Yâkŋe hâhiwin kakŋan manmâ senŋan gewi yakât nângâm sâtgum kinmâ hâkŋe ki alilahop. Yakât otmâ âwâŋe Anitâ yâkât lau lâum manmâ muop. Mum yahatmâ kulet sâningim himbimân yâhâm kunnenje pato otmâ tap. Otmu âwâŋaŋe âi sâm waŋop ya biwiŋaŋe tinâk kepeim manop. Yawu manmâ ki biwi yâhâp olop. Yakât nengu yawuâk yâkât nângâm torokatmâ manmunje ârândân otbuap.

³ Yesu mem âlâlâ tuhuŋetâ yan hâhiwin nângâop. Otmu sâp yiwerenje yu umatnje topnje topnje teteyiŋgiwuap. Umatnje teteyiŋgimu Yesuŋe olop yakât den pat ya nângâm heŋgeŋgumâmâ biwiyeŋaŋe ki gewuap.

⁴ Otmu yeŋe lohotnje otŋetgât Satanŋe perâkŋe topnje topnje mem gamap yan ki lohotnje oai. Otmu Anitâhât hâkâŋ otmaiŋe mem âlâlâ tuhuyekŋetâ yan gurâ kârikŋeâk mansai. Umatnje kakŋan yâhâmu Yesuŋe kârihem kinmâ hâhiwin nângâm muop. Umatnje yawuya yeŋgât kakyeŋan ki yâhâmap. Yakât otmâ yeŋe yâkâlen biwiyeŋaŋe kepeim kârihem manmâ yâhânomai.

⁵⁻⁶ Bukulipne, yuwu sâmunne nângâŋet. Anitâŋe tihitnenŋe otmap yakât nângâm poropete âlâŋe den kulemguop ya yuwu tap.

“Awoŋnenŋe Anitâ yâkŋe tepŋe nângâningimap. Otmu nenŋe otmunŋe bâlemu mâtâp bâleŋan ari hiliwahomaingât yâkŋe kuwiknenekbe sâm hâhiwin ningimap. Hâhiwin ningimu yanâmâ biwi nângân nângânnenŋaŋe

keterakmu yâkâlen torokatmâ komot konohâk manmâ yâhânôm. Yawu otningimap yakât nângâm Anitâne yen kuwikyekmu yeñe yakât ki hâkâñ otnomai. Otmu yen kuwikyekbe sâam yawu otyingimu yeñe biwiyenaje ki gewuap.”

Den yawu tap. Yakât yu nângâm mem mannomaiân umatne topne topne teteyingimu biwiyenaje ki orotok sâwuap.

⁷ Yakât yuwu torokatmâ sâamune nângâñet. Nan baralipnenñaje den kuñetâ me otmâ tâpikguñetâ yanâmâ yongom mem kuwikyekmain. Yakât dopñeâk Anitâne sâamu umatne topne topne teteningimap. Yakât otmâ umatne âlâlâ teteyingiwuap yan yuwu nângânomai. “Main, yuâmâ Anitâne ikne nanne baratne sâam yakât kuwikneneksap.” Yawu nângâm herone otmâ mannomai.

⁸ Yawu gârâmâ Anitâne ki kuwikyekmap mâne yeñe ikne nanne baratne bia, mandu tâñât otbâi.

⁹⁻¹⁰ Otmu torokatmâ sâamune nângâñet. Awonlipyenñaje yongom mem kuwikyekñetâ yâk yenğât amutgen manmâ denyenye lâum manmâ gamai. Yawu gârâmâ Awonjenye himbimân tatmapne mem kuwikyekmu yakât gurâ ki hâkâñ otnomai. Yâkne mem kuwikyekmâ gamap yakât bulâneâmâ himbimân ikne orowâk mannomaihât nângâm yawu otyingimap.

¹¹ Otmu yakât torokatmâ âlâ sâwe. Awonjenye Anitâne kuwikyekmâ gamap yanâmâ hâhiwin nângâm tep bâle otmai. Yâhâ hâmbâi orotmemeyenye bâlene yu pilâm ikne orowâk manman sânduhân manmâ yâhânomai.

Bulâŋe mem tâpikgumain sâŋ biwinenŋaŋe alilangim buku oranjinom.

12-13 Yawu gârâmâ yeŋe ki ihilâk mahilâk man-nomai. Yeŋe manmanyenŋe ya heŋgenŋum mâtâp tâŋ tâŋâk watmâ arinomai. Yeŋe yawu otmâ manŋetâ yeŋgâlen gâtŋe âlâ me âlâ biwi yâhâp otmâ mansaiŋe otmâ tâpikgumai ya pilâm yeŋgâlen torokatnomai. Yawu otmâ yeŋe biwi konohâk otmâ mannomai.

14-15 Otmu hionakmâ yeŋgâlen gâtŋe âlâ me âlâŋe Anitâŋe pat kuyiŋgiop yâk betbanŋim yakât bulâŋe mem tâpikgum hiliwahomaihât yen lohimbi kerehâk biwiyeŋaŋe alilangim buku oranjinomai. Otmu yâk orowâk manmâ yâhânom yakât biwiyeŋe yâkâlen kinbuap. Otmu yakât den âlâ sâwe. Bau ŋasiŋe yaŋe hâreakmâ sânduk sâŋ ârândânŋ otmâ bau mem bâlemap yakât dopŋeâk yeŋgâlen gâtŋe âlâ me âlâŋe otmâ tâpikgum mem bâleyekmahât galemahom mannomai.

16 Nen Esauhât den pat ya nanŋain. Âwâŋaŋe bâtŋe bâiŋe ya membuap sâŋ yâkât pat kuwanŋgiop yakât nânŋâmu tâŋât otmu hâkânŋ olop. Yawu otmâ sotgât nânŋâm imiŋe ulitgumu imiŋaŋe sot waŋmu niop. Nem yan âwâyetŋahât bâtŋe bâiŋe ya imiŋe waŋop.

17 Yâkŋe otmâ tâpikguop yakât kakŋan yâhâpŋe otmune tetewuap mâne yakât pâinmu biatmu hâum pâpŋum imbiâk iwi tepŋe kârâm biwiŋe ŋasin otmu iseop. Yawu otmâ mâtâp ya mem tetewuapgât dop ya ki ehop. Yakât pat ya nânŋâmain. Otmu yeŋgâlen gâtŋe âlâ me âlâŋe yâkŋe olop yawuâk otmâ Anitâŋe pat kuyiŋgiop

yakât nângânetâ gemu Anitâ betgumai sâm yakât galemahom mannomai.

18-19 Emelâk embâjân tâmbâlipnennaje manbi otmu yiwerenje nenne mansain yukât topje teteâkgât yuwu sâmune nângânet. Tâmbâlipnennaje Aihita hân yapâ pilâm taka pumje âlâ, kutje Sinai sâm, yan tatbi. Yan taka tatjetâ Anitâje girem den Mose ekuwe sâm otmu yanâk mun pato pilâop. Lâmun isemap yakât munje ya wangim pilâop. Otmu sâp yanâk elem pato miop. Yanâk kâlâp semu utun pato sahakmu omonguop. Otmu belek sâmu himbim gunjuruj sâop. Yawu otmâ mun pato pilâop yan Anitâje yuwu sâop. “Lohimbi, me songo bau, me âlâ me âlâje pumje yukât gotjan ganomai yamâ kâtje yongonjetâ munomai.” Yawu sâop.

20-21 Yawu sâmu Moseje pârâk pilâm kâi bâtje sânsân sâmu yuwu sâop. “Mainj, nâ kinjtnahât dondâ oan.” Yawu sâop. Sâmu Isirae lohimbi nombotje yâk orop kinbije mun pato ya nângâm yâku yawuâk kinjityenahât otmâ hân mem tep mem asim ahom ahom otbi. Yawu otmâ yuwu sâwi. “Âo, Anitâ. Kulem yu topje âlâ tetemu ekmâ kâi bât sânsân oain. Yakât nenne gâ orop wuân me wuângât alahunomgât dop ki oap.” Yawu sâwi.

22 Yawu gârâmâ Anitâje tatmâ gaop. Otmu tatmâ yâhâwiop. Yâkje yen orop yawu ki otningimap. Yâhâ pumje âlâ, kutje Sion sâm, yakât dopjeâk Anitâje himbimân tatmap, yan arinom. Otmu anelo komotje komotje yañeâmâ yâk hawamgum herone otbangim mepaemai. Otmu nen gurâ yawuâk yâk yengâlen torokatmâ

mepaenom.

²³ Otmu emelâk lohimbi nombotņe Yesuhâlen torokatbi yâhâmâ ikņe pat kuyiņgim kutyeņe kulemgumu tap. Lohimbi ya yengâlen arinom. Emelâk tâmbâlipnenņe nombotņe Anitâhâlen biwiyenņe kepeim manmâ muwi. Yâkņe kulet sâningim Anitâ gotņan tai. Yawu gârâmâ lohimbi emelâk meyehop otmu nen mansain yu, nen kerek sâp patoen menduhunenekbuap. Yawu otmâ topnenņe ekmâ nâņgâm hâmeņe ikņiâk ikņiâk ningiwuap.

²⁴ Yawu gârâmâ lok âlâhâlen hâum sâwe. Lok âlâ, kutņe Awe sâm, yâhâmâ atañe kumu muop. Yakât matņeâmâ Anitâņe atañe ya kâpekbaņgiop. Yawu gârâmâ nengât sâm Yesu kuņetâ mumu hepņe giop. Yakât bonņeâmâ nenņe yâk orop torokatmâ manmâ yâhânongât mâtâp âiņe meningiop. Yawu gârâmâ Anitâņe mem dâinenekmâ gamu yakât ki hâkâņ otnom.

²⁵ Yâhâ topnenņe teteâkgât den âlâ yuwu torokatmâ sâmunne nâņgâņet. Anitâņe girem den Mose ekuop yanâmâ lok nombotņe den ya nâņgâņetâ gemu bet pilâwi. Yakât kakņan yâkņe sâmu yakât matņe umatņe teteyiņgimu manmanyenņe bâleop. Yawu gârâmâ sâp patoen nenņe otbin mewin yakât matņe Anitâņe mem purik pilâningiwuap. Yakât otmâ nanņe Yesu hâņgângumu ge den topņe eknongop ya nâņgâm tiņâk lâum manmâ yâhânom.

²⁶ Emelâk embâņân Anitâņe Sinai pumņan Mose den ekuop yanâmâ hân sânsân sâop. Ya pesuk sâmu yanâmâ yuwu sâm ekuop. “Nâņe sâmunne hân

yu sânsân yap. Yâhâ sâp pesuk sâwuawân âlâkuâk sâmune hân himbim yuâmâ huhuakmâ biatmâ metewuap. Otmu emetsenŋe pitu topŋe topŋe ya pek sâm gulip otmâ metewuap.” Yawu sâop.

²⁷ Anitâŋe den sâop yukât topŋeâmâ yuwu. Yâkŋe sâmu hân, himbim, emetsenŋe, pitu topŋe topŋe âlâlâ yu gulip otmâ metewuap. Yakât kakŋanâmâ ikŋe manmanŋanak tetewuap. Sâp yanâmâ Anitâŋe nengât pat kuningiop yakât bulâŋe ningiwuap.

²⁸⁻²⁹ Anitâŋe nengât sâm manman kârîkŋahât pat kuningiop yakât bulâŋe menom. Yakât otmâ yâk mepaem manmâ yâhânôm. Yawu gârâmâ lohîmbi nombotŋaŋe Anitâhât den nâŋgâŋetâ gemu bet pilâmai ya yengât topyeŋe teteâkgât den âlâen hâum sâwe. Âliwahap haraŋ haraŋ sâm emetŋe mem tatmap yan kâlâp saum katmunŋe semu gâwuŋanak kinmap. Dop yawuâk Anitâŋe sâmu âlâlâ ya sem gulip tuhumu kouŋanak kinbuap. Yawu gârâmâ Anitâŋe nen buku otningîâkgât yâk mepaem heronŋe otbaŋgim mannom.

13

Yuwu otmâ manmunŋe Anitâŋe nenekmu ârândâŋ otbuap.

¹ Orotmeme âlepŋe girawu tap yakât ekyongomune nâŋgâŋet. Yeŋe aŋgoân buku oraŋgiminiwi ya yawuâk torokatmâ buku oraŋgim mannomai.

² Embâŋân aŋgoânâmâ aŋeloŋe lok hâtgum takaŋetâ lokŋe mem buku tuhuyekbi. Yawu gârâmâ lomba nombotŋaŋe yengâlen takaŋetâ dâim yâhâ emelan katyekmâ sot um yinŋinomai.

³ Otmu yengâlen gâtŋe nombotŋe mem pâi emetŋan katyekŋetâ tatmâ hâhiwin nâŋgâmai yakât pâi emetŋan taiâk sâŋ ki gulip malap otnomai. Nenŋe nennahâk pâi emetŋan tain mâne girawu otbâinâ nâŋgâm yâk yengât nâŋgânomai. Otmu yengâlen gâtŋe nombotŋe yamâ lohimbi belângen mansaiŋe mem bâleyekŋetâ hâhiwin kakŋan mansai. Otmu yen yawu otyiŋŋiŋetâ mansai mâne girawu otbâi yakât yâk nâŋgâyŋiŋinomai. Yenâmâ Yesuhât komot konohâk mansai yakât otmâ yeŋe hewewenâk yâk tânyongonomai.

⁴ Otmu den âlâ sâŋmune nâŋgâŋet. Lohimbi sihan mansaiŋe konda otŋetâ Anitâŋe ya ekmu dondâ bâlemap. Otmu lokŋe imbiŋaŋe miakmâ manmutâ ârândâŋ otmap. Yâhâ yakât kakŋan lok me imbi ondop orop manmai ya Anitâŋe ekmâ dondâ bâlemap. Lohimbi yawu otmai yaŋe tosa umatŋe memai. Yakât hâmbâi Anitâŋe matŋe ya tâŋ tâŋâk yiŋgiwuap.

⁵ Emelâk Anitâŋe Mose den ekumu kulemguop ya yuwu tap.

“Nâhâitŋe ki tihit otningimap sâŋ gorâyŋŋimu enŋat yâhâp ki otnomai. Ki pilâyekmune umburuk mannomai.”

Yawu sâop yakât otmâ wahap yu me ya tatningiap ya ekmunŋe ki dopŋan otmu ki dewaenom. Otmu dopnennan tatningiwuap ya wangim ningiâkgât sâŋ ki ulitgunom. Bia kârikŋe. Wuân me wuân tatningiap yamâ dopnennan.

⁶ Anitâŋe den sâop yakât topŋe nâŋgâm yuwu alahum mannom.

“Kutdânenŋaŋe haonmâ ârândâŋ tihitnenŋe otmap. Yakât otmâ lok bâleŋaŋe mem

bâlenenekne sâm otnomai yanâmâ nenŋe yâkât wâtŋan kinmâ mâtâpgât ki hâum pâpgunom. Yâhâ yawu otninginomai yan nenŋe yakât ki gorâningiwuap. Yawu sâm alahum yâkât wâtŋan mannom.”

⁷ Emelâk papatolipyenŋe Anitâhâlen biwi nâŋgân nâŋgânyenŋe kepeim yâkât den ekyongominiwi. Yawu otmâ manmâ ki lohotŋe otmâ gam muwi. Otmu yengu yâkŋe otminiwi yawuâk otmâ Yesu Kiristohâlen biwi nâŋgân nâŋgânyenŋe kepeim ki lohotŋe otmâ mannomai.

⁸ Emelâk Yesu Kiristone tatmâ gaop, âun yu tap, otmu yawuâk tatmâ yâhâwiop kârikŋe. Yakât otmâ ki gorâningiwuap.

⁹ Yawu gârâmâ lok nombotŋe yengâlen taka den ango ekyongowi yakât den pat buku nombotŋe eknohoŋetâ nâŋgâwan. Den ekyongowi ya nâŋgâŋetâ biwi nâŋgân nâŋgânyenŋe gulip malap otmu Yesu Kiristohât mâtâp tâpikgumaihât yuwu sâmune nâŋgâŋet. Den yamâ tâŋât. Yakât otmâ yâkŋe den ekyongowi yamâ ki lâunomai. Yeŋe den tâŋât me orotmeme bâleŋe ya pilâmâmâ Anitâŋe tep âlep nâŋgâyiŋim tihityeŋe otmap ya nâŋgâm heŋgeŋgum biwiyenŋe yâkâlenâk tatbuap. Yawu otmâ manŋetâ yâkŋe mâmâŋe otningim yâhâwuap.

¹⁰⁻¹¹ Yâhâ Anitâŋe lohimbi kerek yengât tosa pilâyinŋiâk sâm hotom uminiwi ya yengât kunyenŋe yuwu otminiop. Yâkŋe selep belâŋen kinminiop yan lama kum gâim yanâmâ hepŋe mem yâhâ alata kakŋan hepŋe tuŋguminiop. Yawu otmu bukulpŋe nombotŋe yaŋeâmâ belâŋen kinmâ bonŋe yamâ mem uŋetâ sem

biatminiop.

¹² Otmu dop yawuâk nenñe Kiristohâlen biwinenñañe kepeim yâkât pat otnehât yâk mem kapi betñehen ge kuñetâ mumu hepñe giop.

¹³ Yakât otmâ nenñe hotom um katmai yakât nângâmunñe gemu selep hânñiñan yan ki yâhânom. Ya pilâm belângen tatmâ Yesuhâlen torokatmâ yâkât denñe lâum mannom. Yawu otmunñe yanâmâ Yesu otbañgiwi yawuâk nen otninginomial. Otmu yakât ki gorâningiwuap.

¹⁴ Nenâmâ kapinenñe yu bia. Kapinenñe dondâñe yamâ himbimân Anitâ tatmap ewan tap.

¹⁵ Otmu Kutdânenñe Yesu yâkñe kulet sâningim himbimân ewan yâhâ tap. Yakât otmâ nenñeâmâ yakât nângâm Ambonenñe Anitâ heronñe nângâwanñim mepaenom.

¹⁶ Otmu orotmemenenñe âlepñe otmunñe Anitâñe nenekmu ârândâñ otmap yakât sâwe. Lo-himbi nombotñe umburuk manmaihât yeñeâmâ yâk nembe kalem otyiñginomial. Otmu nombotñañe hâhiwin kakñan mansai buku otyiñgim tânyongonomai. Orotmeme yawu otmâ mannomai yanâmâ Anitâñe yekmu ârândâñ otbuap.

¹⁷ Otmu papatolipyenñe yeñgât yuwu sâmune nângâñet. Yen manman kârikñahât mâtâp hâum pâpgumaihât yâkñe yeñgât galem otmâ galemyongom mansai. Otmu yâkñe Anitâñe âi sâm yingioop ya biwiyenñañe tiñâk kepeim mem mansai. Hâmbâi sâp patoen yakât hâmenñe yingimu menomial. Yawu gârâmâ biwi nângân nângânyenñe gemapgât yeñe yâk yeñgât amutgen manmâ tem lâuyiñginomial. Tem lâuyiñgim manñetâmâ

yâkņe biwiyenę hewewenę otmu galemýongom henęenęunomai.

18-19 Otmu nâņe bukulipne orowâk tatmâ An-itâhât tem lâuwangim manmâ orotmeme âlepņe otmâ manmunņe nenekmu ârândânę oap. Yawu gârâmâ yeņe biwi nâņgân nâņgânyenę hewewenę otmu nengât sâm Anitâ ulitgum mannomai. Otmu Anitâņe nâ hâņgânnohomu yeņgâlen takawehât gurâ yawuâk ulitgum manņetgât nanęan.

Den bâiņe

20 Bukulipne, den bâiņe ekyongomune nâņgâņet. Kutdânenņe Yesu, yâkņe mumu yan Anitâņe tosanenņe pilâningim manman kârikņahât pat kuningiop. Otmu âwâņe Anitâņe mumuņambâ mem yahalop. Yawu otmâ pat kuningiop yakât bulâņe hâmbâi menomgât mâtâpņe teteop. Ya biatbuapgât dop âlâ ki tap.

21 Bulâņe ya mene sâm Anitâņe mâmâņe otyiņgimu yâkât wâtņan kinmâ tem lâuwangim manņetâ nâņgâmu ârândânę otbuap. Yawu otmu yanâmâ biwi nâņgân nâņgânyenę huruņ sâmu mannomai. Otmu Yesu Kiristo mepaenomai. Ya bonęanâk.

22 Bukulipne, yeņe biwiyenę gemapgât den tâlâwâk yu kulemgum katyiņgian. Yawu gârâmâ yeņe sâlikumâmâ topņe ya nâņgâm henęenęunęet.

23 Otmu tembe lâu pâi emetņe galemņe tatmapņe nâņgâmu Timoteo ya pâi emetņambâ ge mansap. Yâkât den pat yawu sâņetâ nâņgâwan. Yawu gârâmâ yâkņe taka nâ penenihimu yanâmâ netņe orowâk yeņgâlen takarom.

²⁴ Otmu yeŋe pepa yu sâlikum nâŋgâm yengu patolipyene otmu Yesuhât komot mansai ya nâhât den pat yu ekyongom buku otyiŋginomai. Otmu Itali ambolipŋe lohimbi tohoŋetâ mansain yâkŋe yeŋgât tep âlep pato nâŋgâyiŋgim mansai. Yâkŋe yawu nâŋgâyiŋgim mansai yakât yeŋe nâŋgâŋetgât nâŋe den pat yu kulemgum katyiŋgian.

²⁵ Anitâŋe tihityeŋe olâkgât nâŋe haonmâ ârândânŋ ulitguman. Den pat katsan yu yuâk.

Yeshuât Den Pat Âlepŋe
The New Testament in the Selepet Language of Papua
New Guinea
Nupela Testamen long tokples Selepet long Niugini

copyright © 1986 Wycliffe Bible Translators, Inc.

Language: Selepet

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files dated 31 Aug 2023

995083d2-705e-5a60-af47-1e36806ccbc